

ԲԱՆԱՎԵՃԵՐ ԵՎ ՔՆՆԱՐԿՈՒՄՆԵՐ ДИСКУССИИ И ОБСУЖДЕНИЯ

ՀԱՅԱՍՏԱՆԸ ԵՎ ԱՌԱՋԻՆ ՍԱՍԱՆՅԱՆՆԵՐԸ

Թանասիր. գիտ. դոկտոր Ա. Ա. ՄԱՐՏԻՐՈՍՅԱՆ

Պայկուլիի և Քաաբա ի Զարդուշտի արձանագրությունները թույլ են տալիս ճշտումներ մտցնել հայ ժողովրդի III դարի պատմության ժամանակագրության մեջ:

Քաաբա ի Զարդուշտի արձանագրությունը (KZ)¹ գրված է Շապուհ I-ի ղեկավարությամբ հավերժացնելու համար: Արձանագրության մեջ հիշվում է Վալերիանոսի պարտությունը, որը տեղի է ունեցել 260 թ. խառնի և Եղեսիայի մոտ: Պարսկերեն բնագրի XVIII և հունարեն ALI տողերում, ինչպես նաև պարսկերեն XX և հունարեն XVIII տողերում տրվում է Շապուհի որդու՝ Որմիզդ-Արտաշիրի անունը, որպես «Հայաստանի մեծ թագավոր»:

Ազաթանդեղոսի և խորենացու համաձայն պարսից Արտաշիր I Պապականի (224—241) դեմ դուրս է դալիս խոսրով Մեծը: խորենացին նրան ժամանակակից է համարում հռոմեական կայսրերի, որոնք իշխել են 244—260 թթ.: Այս անախրոնիզմը մնում էր անբացատրելի: խոսրովը, սակայն, պայքարել է Արտաշիրի դեմ, բայց ոչ՝ Արտաշիր Պապականի, որ Սասանյան առաջին գահակալն էր, այլ նրա թոռան՝ Որմիզդ-Արտաշիրի:

խորենացու մոտ այդպես է ստացվել ակամա. նա օգտվում է Փիրմեկիանոսից, բայց չէր կարող շրջանցել Ազաթանդեղոսին, որ անառարկելի էր հայ պատմիչների համար, և նրա հետևության մեջ խոսրովին ժամանակակից է դարձվել Արտաշիր I-ը: Վերանձնավորված է պարսից արքան և ոչ՝ հայ թագավորը:

խոսրովի գահակալության շրջանը պարզելիս հայոց արքայացանկը շատ բանով կարելի է ճշտել:

Զոնարասը գրում է, որ Շապուհը, Գալլոս կայսեր ժամանակ, 252/3 թ. նվաճեց Հայաստանը:

«Առ սովաւ (Գաղղեաւ) սկսան խլրտել Պարսիկք, որ հասին գրաւեցին զՀայաստան, ուստի փախեաւ արքայն (հայոց) Տրդատ, այլ որդիք նորա անկան առ Պարսիկս»²:

Եթե հետևենք հայ պատմագիտական տրադիցիային, ապա դա Տրդատ Մեծն է, որովհետև խոսրովը պայքարել է Արտաշիր I-ի դեմ, և նրա որդին

¹ Արձանագրությունը հայտնաբերվել է 1936—1939 թթ., պեղումների ժամանակ: Լավագույն հրատարակություններ են՝ E. Honigmann, A. Maricq, Recherches sur les Res Cestae divi Saporis, Bruxelles, 1953; M. Springling, Third Century, Iran, Sapor and Kartir, Chicago, 1953; A. Maricq, Res Gestae divi Saporis, „Syria“, Paris, XXXV, 1958.

² Զոնարաս. Տարեգիրք ԺԻ—21, տե՛ս 3. Տաշեան, Ազաթանդեղոս առ Գեորգայ խոսրի և պիսկոպոսին. Վիեննա, 1891, էջ 106:

կարող էր առնչվել Շապուհ I-ի հետ, որ հաջորդեց Արտաշիրին: Կա համաձայնության և ուրիշ եզր. Տրդատը նույնպես ապավինել է հռոմեական իշխանությանը:

Բայց այսբանը: Տրդատը պետք է մանուկ լիներ, «մանկիկ մի փոքրիկ», որ «առեալ դայեկացն փախուցեալ» («ի տղայութեան փախուցեալ»³) ի դուռն կայսեր ի կողմանս Յունաց»⁴, իսկ Զոնարասի հիշատակած Տրդատը հասուն մարդ է, որի որդիները շահեմեջին նրան:

Այդ հանդամանքը բացատրելու համար դանաղան վարկածներ են առաջադրվել:

Դեռ վաղուց, Զամչյանից սուաջ, պատմաբաններն արդեն ենթադրում էին, որ կարող էր այդ Տրդատը Տրդատ Մեծը չլինել: Զամչյանը համաձայն չէ. «Այս բանք յայլևայլ զրուցաց խառնեալ են և շունին ինչ ստուգութիւն»⁵, — որոշում է նա:

Գուղշմիդը և Մարկվարտը Զոնարասի բնադրում *παῖς* (որդիների) բնթերցվածը փորձում են ուղղել: Գուղշմիդը առաջարկում է *παῖς* (քաղաքներ), իսկ Մարկվարտը՝ *παῖς* (հորեղբայրներ)⁶:

Դա սրամիտ է, բայց ինչպես հետևում է KZ արձանագրությունից, խոսքովը գործել է ավելի ուշ և Զոնարասի հիշատակած Տրդատը չէր կարող նրա որդին լինել՝ Տրդատ Մեծը, այլ, թերևս, հայրը: Հենց այդ Տրդատն է, որ

³ «Ազախանգեղալ Պատմութիւն Հայոց», Տփղիս, 1909, Գ—36:

⁴ «Նդիշէի վասն վարդանայ և Հայոց պատերազմին», Երևան, 1957, էջ 72:

⁵ Մ. Զամչյան, Պատմութիւն Հայոց, հատ. Ա, Վենետիկ, էջ 615: Զամչյանը վկայաբերում է Տիգրանի մասին, որ Մակրինոս կայսեր վարրի մեջ Տրդատ Մեծ և Տրդատ-Տիրիթից բացի հիշում է ևս երկու Տրդատ. «Զմինս ղնէ յամի տեան 217, պսակեալ ի Մակրինոս կայսերէ և զմիսն յամի 252, որ վանեցաւ ասէ ի Շապուհ արքային պարսից» (էջ 615—616): Տաշյանը, Անիսկին, Մանանդյանը և ուրիշներ, տարբերակելով Զոնարասի հիշատակած Տրդատին Տրդատ Մեծից, նրան նույնացնում են Մակրինոսի թագադրած Տրդատի հետ (տե՛ս Տաշյան, Ազաթ., էջ 106—107: А. Анни́нский, Древние армянские историки как исторические источники, Одесса, 1899, էջ 43: Հ. Մանանդյան, Քննական տեսություն հայ ժողովրդի պատմության, հատ. Բ, մասն Ա, Երևան, 1957, էջ 85:

Տրդատ I-ից բացի Կ. Թումանովը ճանաչում է ևս երեք Տրդատ, ժամանակագրական այսպիսի հաջորդականությամբ. Տրդատ II՝ 216/7—252, Տրդատ III՝ 287—293 («տրոհված Հայաստանի» արևմտյան հատվածում), 293—298 («վերամիավորված Հայաստանում») և Տրդատ IV կամ Տրդատ Մեծ, խոսքով II-ի որդին՝ 298—330 (տե՛ս С. Toumanoff, The Third Century Armenian Arsacids. A Chronological and Genealogical commentary, „Revue des études Arméniennes“, VI, 1969, էջ 255, 274):

⁶ Zeitschrift der Deutschen Morgenländischen Gesellschaft (ZDMG), 31, էջ 48—49 և ZDMG, 49, էջ 652: Մոմզենը Զոնարասի բնթերցումը ուղղում է անորոշ ձևով, «Օրինական թագավոր Տրդատը փախավ հռոմեացիների մոտ: Թագավորական տան մյուս անդամները անցան պարսիկների կողմը» (Т. Мо м з е н, История Рима, Москва, 1949, էջ 387): Խալաթյանը հետևում է Մոմզենին. «Պատանի Տրդատը (III) Արշակ II-ի (նույնպես խոսքովի) որդին, որ թագավորում էր 238 թ., փախավ հռոմեացիների մոտ այն դեպքում, երբ հայկական թագավորական տան մյուս անդամները հանձնվեցին հաղթողին» (Г. Х а л а г я н и, Очерк истории Армении, 1910, էջ 238): Աստուրյանը և Քասունին հակված են ընդունելու Մարկվարտի ուղղումը (Աստուրյան, Քաղաքական վերաբերություններ ընդմեջ Հայաստանի և Հռոմի, Ա. Ղազար, 1912, էջ 243, Շանդես Ամսոբյան, 1914, ԻԸ, էջ 401): Այդ առթիվ դիտողություններ ունեն Նյուդեբեյն, Տուրնեբիցը (Nö l d e k e, Aufsätze zur persischen Geschichte, Leipzig, 1887, էջ 93: Tournebieze, Histoire politique et religieuse de l'Arménie, Paris, 1910, էջ 130, 802) և ուրիշներ:

երկար ժամանակ հաջողությամբ պայքարեց Արտաշիր I արքայի դեմ, և երկիրը մնաց աննվաճ։

Սասանյանների քաղաքական նկրտումներին դա հակառակ էր, և նրանք փորձեցին դիմել խարդավանքի։

Տրդատը փախչում է հոռմենացիների մոտ, իսկ նրա որդիները ընդունում են պարսից իշխանությունը⁷։ Թերևս գահակալական պայքարի Համենայն դեպս, նրանք չեն բաժանում իրենց հոր քաղաքական կոմունորությունը։

Երբ Արտաշիրը գահը խլեց պարթևական վերջին արքայից, նախարարական որոշ տներ և ավադանին, որ հարազատ էին Արշակունիներին, եկան Հայաստան։ Այդ մասին վկայություններ ունեն և՛ օտար, և՛ հայ աղբյուրները⁸։ Իայց դինաստիական ատելությունը, իբրև զգացում, շատ ավելի թույլ էր և տեղի տվեց քաղաքական շահագրգռություններին։

Հայ գահակալը Սասանյաններին դիմագրավելու համար փորձում էր համախմբել պարթևներին, բայց ասպարդյուն. «Դեսպան արարեալ,— գրում է Ագաթանգեղոսը,— զի իւրեանց տոհմայինքն ի թիկունս եկեսցեն... սակայն տոհմքն և ազգասլետքն և նախարարքն և նահապետքն Պարթևաց ոչ լինէին ունկնդիր. զի միամտեալ և հաւանեալ և նուաճեալ էին ի տէրութիւնն Արտաշրի, քան ընդ տէրութիւն իւրեանց ազգատոհմին և եղբայրութեանն»⁹։ Սասանյաններն էլ, իրենց հերթին, պարթևական տների նկատմամբ ցուցաբերում էին ինչ-որ հանդուրժողականություն։

Քաղաքական պայքարի և ուժերի վերախմբավորման այս պահերին և համընկնում խոսքովի և՛ դահակալումը, և՛ վախճանը։

Խոսքովի Տրդատ II-ի որդիներից էր, որ շուղեկցեց նրան և դա, անշուշտ, դեր խաղաց խոսքովի թագադրման համար։ Նա իշխանության է հասնում պարսիկների համաձայնությամբ կամ թողտվությամբ, և նրա գահակալության սկիզբը պետք է համարել նույն 252/3 թ.։ Մեղ անհայտ է, խոսքովի ինչ չափով է պայքարել Սասանյան Ռաքսի դեմ, Այն, որ ավանդում է Ագաթանգեղոսը և հետո անցել է հայ պատմիչներին, թերևս վիսպական տարր ունի, բայց վերաբերում է ավելի շատ նրա հորը՝ Տրդատ II-ին¹⁰ և քիչ՝ նրան։ Ամեն դեպքում խոսքովի իշխանությունը կարճ եղավ։

Գոթերը ներխուժել էին Փոքր Ասիա, իսկ պարսիկները շարունակում էին իրենց հաղթական ելքը Եփրատի ափերից շատ հեռու 256 թ. Արևելք է գալիս Վալերիանոսը։ Թերևս խոսքովի հակվում է նրան, որ ճակատադրական եղավ։ Այդպիսի համոզման կարող է բերել խորենացին։

Ագաթանգեղոսը պատմում է, որ խոսքովին սպանեց պարթև Անակը,

7 Ս. Տ. Երեմյանը, հենվելով Զոնարասի այդ տեղեկության վրա, գրում է. «Տրդատ III-ի որդիների մի մասը մերձել էր հոր հոռմենացի քաղաքականությունը և մնացել էր Հայաստանի պարսկական հատվածում, իսկ մյուսները, նախարարների զղալի մասի և Տրդատ II-ի հետ, անցել էին Մեծ Հայքի հոռմենական մասը»։ Նա կարծում է, որ Հայաստանի հոռմենական մասում շարունակեց թագավորել Տրդատ II-ը (մինչև 273 թ.), որին հաջորդեց խոսքովի (273—357)՝ «Տրդատ Մեծի հայրը» («Լրարեր», 1975, № 1, էջ 14, 21)։

8 C D I O N. LXXX, «Մովսիսի խորհնացույ Պատմութիւն Հայոց», Տփղիս, 1913, Բ—ՀԲ, ՀԳ։ Ա գ ա թ. Բ—28։

9 Ա գ ա թ. Ա—20։

10 խոսքովի վարքը վիսպական զույն ստացավ V դարի պատմիչների կողմից իբրև Տրդատ Մեծի՝ առաջին քրիստոնյա թագավորի հայր։

որին ուղարկել էր հենց ինքը՝ արքան և խոստացել «ազգի ազգի պատիւս և պարգևս և վարձուց հատուցմունս»¹¹։

Նա գալիս է հոսրովի մոտ իբրև ապստամբ, որ չի ընդունում Մասանյան իշխանությունը. «Իբրև ետևս թագաւորն Հայոց՝ ցնծացեալ ել ընդ առաջ նորա և մեծաւ խնդութեամբ ընկալաւ զնա»¹²։ Դա շատ հավանական է։

Եղիշեի մոտ, սակայն, այլ հիշողություն է պահված։ Թեոդոս կայսեր հղած նամակում ասված է, որ Տրդատը տղա ժամանակ փախավ հունաց կողմերը «ի հայրասպան մարդախողիող հօրեղբարցն իւրոց»¹³։

Ուրեմն հոսրովին սպանել են եղբայրները։ Դա նույնպես հավանական է։ Նրանք արդեն պարսկական կողմնորոշում ունեին։ Մենք այդ գիտենք Զոհարաւից¹⁴։

Ամեն դեպքում, եղբայրները թե ևնակր, միևնույն է, քանի որ ևնակը եղբայր էր որպես տոհմակից, «նահապետ պարթևաց տէրութեանն»։ Եվ իդուր չէ, որ հայ պատմիչները դա ընդունել են որպես եղբայրասպանություն։

Խորենացին հոսրովի մահը դնում է Վալերիանոսի ժամանակ, Դա տեղի է ունեցել կայսեր դերումից թերևս մի փոքր առաջ։

Ժամանակագրական այս տվյալները չեն ուղղում ընդունել և՛ այն պատմաբանները, որոնք ևզաթանդեղոսի և հոսրենացու հետևություններ գտնում են, որ հոսրովը Արտաշիռ I-ի ժամանակակիցն է, և՛ նրանք, որ մերժում են այդ։

Եթե հոսրովը Արտաշիռի ժամանակակիցն է և սպանվել է նրա խարդավանքով, ապա չէր կարող որևէ առնչություն ունենալ Վալերիանոսի հետ։ Արտաշիռը գահակալել է 224—241 թթ., իսկ Վալերիանոսը՝ 256—260։

Բայց եթե Տրդատ II-ն էր Արտաշիռ I-ի ժամանակակիցը, ապա նրա փախուստից հետո հիշատակվում է մի ուրիշ թագավոր՝ Արտավազդ։

Տրիբելլիոս Պոլիոնը գրում է, որ Վալերիանոսի գերության առթիվ հայոց թագավոր Արտավազդը նամակ է հղել Շապուհին։ Հայոց թագավոր Արտավազդը։ հոսրովի համար տեղ չի մնում։

Արտավազդի ինքնության շուրջ հեղինակները տարամիտում են, բայց նրա գահակալությունը ընդունվում է աներկբա¹⁵։

Իսկ ի՞նչ են ասում հայ պատմիչները։

11 Ա. Կ. Թ., Բ—24։

12 Ա. Կ. Թ., Բ—29։

13 Ե. Գ. Ի. Լ., Էջ 72։

14 Մոմզենի և Խալաթյանցի կարծիքով դավադրությունը վերաբերում է հոսրովի հորը՝ Տրդատ II-ին (տե՛ս Մոմ. շեն, История..., էջ 387, Халатянц, Очерк..., էջ 339)։

15 Աննիսակին, Խալաթյանցը և Մանանդյանը Արտավազդի գահակալությունը դնում են 252—272/3 թթ., Նրեմյանը՝ 252/3—261/2։ Պերպերյանը և Թումանովը գտնում են, որ Արտավազդը նույնն է Մասանյան Որմիզդ-Արտաշիռի հետ։ Թումանովի ժամանակագրական սխեմայի համաձայն Արտավազդը (Որմիզդ-Արտաշիռը) իշխել է 252—271 թթ. (Аннисакян, Древние..., էջ 135; Халатянц, Очерк..., էջ 339; Մանանդյան, Բնական..., Բ, էջ 95, Երեմյան, Նախ-ի-մուստեմի «Քաարա ի Զարդուշտի» հուշարձանի արձանագրության վկայությունները Հայաստանի մասին, «Պատմա-բանասիրական հանդես», 1966, № 2, էջ 69, նույնի՝ Հայաստանի բաղարական վիճակը Արտավազդ V-ի ժամանակ (252/3—261), ՀՍՍՀ ԳԱ «Լրաբեր» (հաս. գիտ.), 1975, № 1, էջ 13—21։ Պերպերյան, Որմիզդ-Արտաշիռ մեծ արքա Հայաստանի, «Ջվարթնոց», 11, 1944, էջ 167—173։ С. Toumanoff, The Third Century Armenian Arsacids. «Revue», էջ 253, 274)։

Աղաթանգեղոսը գրում է, որ խոսքովի մահից հետո ոչնչացնում են Անա-
լիի տոհմը, ապա դալիս է պարսից թագավորը. «Ջորաթողով լինէր, խաղայր
զնայր, ասպատակ սփռէր ղկողմամբ Հայաստան աշխարհին»¹⁶: խոսքովի
աղանույթյան և Որմիզդ-Արտաշիրի կողմից Հայաստանը վերագրավելու մի-
ջև ինչ-որ ժամանակ է տնցել: Իսկ ավելի հստակ է հորհնացու մոտ:

«Նոյն այր ասէ, եթէ յետ սուսերահարն լինելոյ խոսքովու, միաբանեալ
նախարարք հայոց ածեն իւրեանց յօղնականութիւն զգօրս Յունաց, որ ի Փոլի-
զիայ՝ Պարսից բնդդիմանալ և պահել զաշխարհս»¹⁷:

Բայց հույները չեն կարողանում օգնել. «Վասն որոյ համարձակաբար
արշաւեալ ի մեզ Արտաշիւրի, և զգօրս Յունաց փախստական արարեալ, գերե-
լով զյոլով մասն աշխարհիս՝ յաւեր զարծուցանէ»¹⁸:

Ինչպես տեսնում ենք, հայերը խոսքովի մահից հետո փորձել են կազմա-
կերպել դիմադրություն և խոսքովի մահվան ու Հայաստանը Արտաշիրի կող-
մից գրավելու միջև ժամանակ է տնցել:

Արտավազդը նամակ է գրում Շապուհին, գերված Վալերիանոսին ազա-
տելու համար, ուրեմն նրա գերությունից հետո, բայց առաջ՝ քան արձանա-
գրությունը, որովհետև արձանագրության մեջ թագավոր է հիշված Արտաշի-
րը: Այդ սահմանագիծը կարող է լինել 259—261 թթ.: Վալերիանոսը գերվել
է 259-ի վերջին կամ 260-ի սկզբին, իսկ արձանագրությունը չէր կարող 262 թ.
ավելի ուշ գրվել: Այն ուղղակի Շապուհի հաղթանակի մասին հրովարտակ է,
որ պետք է հետևեր հաղթանակին: Արտավազդն իր տեղը զիջել է Շապուհի
որդուն հենց Վալերիանոսի պարտության պատճառով:

Ասվեց, որ խոսքովի սպանվել է Վալերիանոսի գերումից ոչ շատ առաջ,
և խոսքովի սպանությունից մինչև Արտաշիրի գահակալությունը հենց այն
ժամանակահատվածն է, որ նշում են երկու պատմիչներ՝ Ագաթանգեղոսը
և խորենացին և որ մնում է բաց: Այդ բացն է լրացնում Արտավազդը:

Խոսքովի II-ի որդին, որ գահաժառանգն էր, երկրից հեռանում է նախա-
րարական տների հետ, Որմիզդ-Արտաշիրի գալուց հետո միայն. «Յորմէ գաղ-
թեալ նախարարքն Հայոց, հանդերձ ազգայն Արշակունեաց ի Յոյնս ապա-
ւինէին. յորոց մի էր և Արտաւազդ Մանդակունի, որոյ առեալ զՏրդատ որդի
խոսքովու՝ ի դուռն կայսեր հասուցանէր»,— գրում է պատմիչը (Բ—Հէ):

Խոսքովի մահից մինչև Արտաշիրի գահակալումը գահի օրինական ժա-
ռանդորդը մնացել էր երկրում. ուրեմն նոր գահակալ պետք չէր: Խոսք
կարող էր լինել միայն խնամակալության մասին: Այդ դերը կատարում էր Արտա-
վազդ Մանդակունին: Նա է հոգ տանում Տրդատի կյանքի համար և փախցնում
«ի դուռն կայսեր» և, թերևս, հենց նա Տրիբելլիոս Պոլլիոնի հիշատակած Առ-
տավազդ թագավորի հետ նույնն է:

Բայց ինչպե՞ս մեկնել Տրիբելլիոս Պոլլիոնի հաղորդումը:

Այդ բնագիրը մտնում է «Վարք կայսերաց» («Scriptores Historiae Au-
gustae, SHA») շարքի մեջ, որն ունի կիսապատմադրական, կի-
սաստեղծագործական բնույթ. կենսագրական տեղեկություններ են կամ

¹⁶ Ա գ ա թ., Գ—35:

¹⁷ Խ ո ռ Ե ն ա ջ ի., Բ—29:

¹⁸ Ն ու չ ն տ ե ղ ու մ:

գրույցներ, ուր պատմական իրողությունները գունավորված են ստեղծագործական երևակայությամբ և հեղինակներն իրենց ազատ են զգում: Տրիրելլիոս Պոլլիոնին ոչինչ չէր խանգարի Արտավազդին անվանելու հայոց թագավոր, իսկ դա պետք էր: Պոլլիոնը ուզում է ջուլց տալ, թե ինչպիսի մեծ արձագանք ունեցավ Շապուհի կողմից Վալերիանոսի գերեվարումը: Բայց երբ նրան ազատելու համար նամակ է գրում թագավորի խնամակալը, և ոչ թե թագավորը, դա չի կարող տպավորիչ լինել¹⁹:

Որ գործ ունենք ոճավորված պատմական փաստի հետ, կարելի է նկատել և նամակից.

«Արտավազդ հայ թագավորը Շապուհին ուղարկեց այսպիսի նամակ. «Համակիր եմ քո փառքին, բայց վախենում եմ, որ դու ոչ այնքան հաղթանակ չահեցիր. որքան սերմանեցիր նոր պատերազմներ: Վալերիանոսին ետ են պահանջում և՛ նրա որդին, և՛ թոռը, և՛ հոռմեական զորավարները, և՛ ամբողջ Գալլիան, և՛ ամբողջ Աֆրիկան, և՛ ամբողջ Իսպանիան, և՛ ամբողջ Իտալիան, և՛ բոլոր ցեղերը, որոնք ապրում են Իլլիրիկումում, Արևելքում և Պոնտոսում, որոնք հոռմեացիների զաշնակիցն են կամ նրանց հպատակ: Դու գերի վերցրիր մի ծերունու, բայց ամբողջ երկրի բոլոր ցեղերին դարձրիր բեղ կատաղի թշնամիներ և, հնարավոր է, և մեզ, որ բեղ ուղարկեցինք օժանդակ ջոկատներ: Մենք ձեր հարեաններն ենք և միշտ տուժում ենք ձեզ համար ձեր բախումների ժամանակ»²⁰:

Հաղթող արքայից արքային այդպիսի նամակ չէր գրի մի երկրի թագավոր, որ նրա իշխանության տակ էր: Դա ավելի է արտահայտիչ ընդհանուր կոնտեքստի մեջ: Պոլլիոնը բերում է երկու ուրիշ նամակ, որ ստորագրել են Բեդսոդոսը և կատիչների թագավոր Բադենոսը: Այդ նամակները նման են իրար և գրված են նույն ոճով: Եթե դրանք առհասարակ պատմական են, ապա խստորեն ենթարկված են գեղարվեստական մշակման: Այդ դեպքում Արտավազդը, իհարկե, կարող էր կոչվել թագավոր:

Արտավազդը Տրդատի խնամակալն էր և չունեի թագավորական ստատուս²¹:

Խորենացին Խոսրովի մահից մինչև Տրդատի թագավորելը կոչում է «ժամանակս անիշխանության», որի մասին նա քաղում է հույն պատմիչ Փիրմե-լիանոսից. «Իսկ որ ինչ զկնի մահուանն Խոսրովայ մինչև ցթագաւորութիւնն

19 Հետաքրքիր է Կայսերաց գրքի հեղինակներից մեկի՝ Վոպիսկոսի գրույցը Հռոմի սրբ-ֆեկտ Յունիուս Տիրերիանոսի հետ, որ պատվիրում է նրան գրելու Ալլրելիանոսի կենսագրու-թյունը. «Տիրերիանոսն ազաց, որ Պոլլիոնը շատ բան անփույթ, շատ բան չափազանց համա-ռոտ է շարադրել: Իսկ ես առարկեցի ասելով. թե չկա ոչ մի գրող, համենայն դեպս պատմիչ, որ որևէ բան հնարած չլինելու ես բերեցի... Լիրիոսի, Սայուստիոսի, Կոռնելիոս Տակիտոսի և վերջապես Բրոդոսի օրինակները: Այդ ժամանակ Տիրերիանոսը, համաձայնելով ինձ հետ և թափահարելով ձեռքը, կատակով ասաց. «Դրիր, ինչ բեղ հարմար է: Դու ազատ կարող ես ասել, ինչ ցանկանում ես, բանի որ բո ստի ուղեկիցները պատմական պերճաստություն վար-պետներ են, որոնցով մենք հիանում ենք» (SHA, XXVI, II, 1—2):

20 SHA, XXVI, III, 1—3.

21 Այնչա՛նք, հարազատորեն հետևելով Խորենացուն, գրում է. «Յայնժամ թուին Արտա-վազդայ, որ զերծոյցն զՏրդատ ի կոտորածէ հայրենի տանն, ոչ միայն դաստիարակ կացեալ նմա յօտարութեան, այլև իրրև զլուխ իշխանաց առաջնորդեալ Հայոց թափեալ զաշխարհն, զեթ առ ժամանակ մի, մինչև թագաւոր իսկ Հայոց կոչել զնա օտարաց» («Այրարատ», էջ 374):

Տրդատայ ի ժամանակս անիշխանութեանն պատմէ՝ ստոյգ համարելով երկրորդեմք քեզ համառօտ բանիք»²²։

Այդ ժամանակ Հայաստանի թագավոր էր Որմիզդ-Արտաշիրը և ապա, Պայկուլիի արձանագրության համաձայն, ներսեհը։ Խորենացին դա համարում է անիշխանության շրջան. նրա մոտ Արտաշիրը անձնավորում է Արտաշիր Պապականին, որ Պարսկաստանի տիրակալն էր և չէր կարող միաժամանակ նստած լինել հայկական դահին։ Այդպես է մտածում պատմիչը և գրում, թե Արտաշիրը «կալաւ զաշխարհս մեր որպէս զմի յաշխարհացն իւրոց պարսիկ գործակալօք»։

Բնչեւ, Խորենացին անիշխանության ժամանակը հաշվում է Արտաշիրի տիրապետության շրջանից։ Որմիզդ-Արտաշիրի և նրա հաջորդի իշխանութիւնը միասին, «մինչև ցթաղաւորելն Տրդատայ», նա թվում է «ամս քսան և վեց և ամ մի»՝ քսանյոթ տարի։ Արտաշիրը, համաձայն KZ արձանագրության տվյալների, «կալաւ զաշխարհս մեր» 261 թ.։ 261-ից եթե հաշվենք 27 տարի, անում է 287։

Դա համընկնում է Խորենացու ուղղակի տվյալին, որ նա բերել է իր Բ գրքի ԶԲ գլխում. «Քանզի ոչ է պատմութիւն ճշմարիտ առանց ժամանակագրութեան, վասն որոյ և մանրախուզիւ բննեալ՝ գտաք զթագաւորելն Տրդատայ յերրորդ ամի Դիոկղետիանոսի»²³։

Դիոկղետիանոսը կայսր հռչակվեց 284 թ., բայց մինչև 285 թ. դեռ ապրում էր նախկին կայսրը՝ Կարինոսը և չէր ուզում գիշել իր իշխանութիւնը։ Այդպիսով Դիոկղետիանոսի երրորդ տարին անում է 286 կամ 287։ Հավաստվում է Խորենացու հաղորդումը Տրդատի գահակալության տարեթվի մասին. «Յևբոբոյ ամի Դիոկղետիանոսի»։

Ժամանակագրական տեղեկություններ ունի և Սեբեոսը։ Նա Տրդատի գահակալությունը դնում է Դիոկղետիանոսի 15-րդ տարում, որ հասնում է մինչև 298 թ.։

Աննինսկին և ակադ. Մանանդյանը ճիշտ են համարում Սեբեոսին և մերժում են Խորենացուն։ Մանանդյանը գտնում է, որ Խորենացու ժամանակագրական սխեման կազմված է զխավորապես Աղաթանդեղոսի վկայությունների և Սեբեոսի սխալաշատ ժամանակագրական ցանկերի հիման վրա, իսկ Սեբեոսի ճիշտ թվականները «հավանորեն նրան հայտնի են եղել թանկարժեք մի այլ աղբյուրից»²⁴։ Թեև Բայց եթե պեղենք անհարիր շերտերը, Սեբեոսի տվյալները համաձայն են KZ արձանագրությանը և հաստատում են Խորենացուն։

Սեբեոսը գտնում է, որ Տրդատը գահակալել է Դիոկղետիանոսի տասնհինգերորդ տարում։ Նրա մոտ սակայն այլ է Դիոկղետիանոսի առաջին տարին. Այդ մասին պատմիչն ասում է ԽԴ գլխում. «Յամի ԺԳ՝ երեքտասներորդի կենարարին և փրկչին մերոյ Յիսուսի Քրիստոսի թագաւորէ Դիակղետիանոս, երեք ընկերաւքն թագաւորութեանն Հռովմայեցոց»²⁵։

«Յամի ԺԳ» Քրիստոսի 261 թ. է։ Հռոմեական թվագրության նոր փուլն

²² Խորենացի, Բ—ՀԵ։

²³ Խորենացի, Բ—ԶԲ։

²⁴ Մանանդյան, Քննական..., Բ, էջ 104—105։

²⁵ «Սերլոսի Լափսկոպոսի Պատմութիւն», Երևան, 1939, էջ 132—133։

սկսվում է 249-ից²⁶։ Ուրեմն համաձայն Սեբեոսի Դիոկղետիանոսը կայսր հռչակվեց 261 և ոչ ինչպես իրականում, 284 թ., 23 տարով ավելի վաղ, և նրա 15-րդ տարին անում է 275, որ դառնում է Տրդատի գահակալության սկիզբը։

Ինչպես տեսնում ենք, Աննինսկու վարկածը Սեբեոսի ժամանակադրության մեջ ոչ մի հաստատում չունի։

Թերևս ժամանակագրական աղյուսումները Սեբեոսին չեն, այլ անանուն մի հնդիկակի, ինչպես կարծում են որոշ բանասերներ և, հնարավոր է, Անանունը չի օգտվել հռոմեական թվականից։ Բայց հենց աղյուսակներում էլ դեպքերը շփոթված են 20—25 տարով։ Այսպես, Կարոսի և նրա հաջորդի՝ Դիոկղետիանոսի մասին Անանունը գրում է.

«Եւ ապա՝ ժամ եղև պատերազմ մեծ ի մէջ Խառանու և Ուրհայի, հարկանեն և վանեն զգարն ճունաց, և մեռանի Կարոս ի պատերազմին հանդերձ միով որդւովն Կարիանոսի։ Եւ ի նմին ամի թագաւորէ Յունաց Դիոկղետիանոս»²⁷։

Կարոսը Արենիք է զաւրիս 282 թ. և մտնում Հայաստան։ Վահրամ II-ը խաչադուրբյան ղեկավարներ է հղում, բայց նա չի ուղում ընդունել, շարժվում է Միջագետք, արագորեն նվաճում Սելեկիան, հասնում Տիգրոն։ Կարոսի վարած պատերազմները միայն հաղթական են։ Նա չի սպանվել պատերազմում, այլ կայծակնահար է եղել Տիգրիսի ափերին կամ խոցվել յուրախնի դաշույնից, իսկ որդին՝ Կարինոսը, սպանվել է Երկու տարի հետո, 285 թ. Մյուսիսյում, Սարգոսի տակ, Դիոկղետիանոսի ղեմ մղված ճակատամարտում։ Այն, ինչ պատմում է Անանունը, նրանց հետ կապ չունի։

KZ արձանագրության մեջ ասված է, որ Շապուհը պարտության մատնեց Վալերիանոսի կողմից առաջնորդվող հռոմեական զորքերին Խառանի և Ուրհայի մոտ։ Հենց նույնն է Անանունի ժամանակադրության մեջ. «Եւ ապա՝ ժամ եղև պատերազմ մեծ ի մէջ Խառանու և Ուրհայի, հարկանեն և վանեն զգարն շունաց»։

Ինչպես տեսնում ենք, Կարոսը շփոթված է Վալերիանոսի հետ և 20—25 տարով ետ է գնացել։

Խառանի և Ուրհայի պատերազմը եղել է 260 թ.։ Անանունը այդ ժամանակ է դնում Կարոսի վախճանը և որովհետև իսկապես Կարոսին հաջորդել է Դիոկղետիանոսը, ուրեմն նա, համաձայն Անանունի, գահակալել է 261 թ., ինչպես բուն Սեբեոսի մոտ ուղղակի հաշվով²⁸։

Հենց այդտեղ Անանունը կամ Սեբեոսը, հիշելով Տրդատի հոր՝ Խոսրովի

²⁶ Հռոմեական թվագրությունը հաշվվում է Հռոմի հիմնադրումից, այն է՝ մ. թ. ա. 753 թ.։ Մեկ հազարամյակ հետո, որ լրացավ մ. թ. 248 թ., սկսվեց հռոմեական թվագրության երկրորդ փուլը, 249 թ. համարվեց հռոմեական թվագրության առաջին տարին։

²⁷ Սեբեոսի մոտ տարօրինակաբար այն կոչվում է Կենարարի թվական։ Մալխասյանը դրան ուշադրություն չի դարձնում (տե՛ս «Էքմիածին», 1944, հունվար, էջ 22—26), ի. Ս. Խաչիկյանը կարծում է, որ բնագրի մեջ «Երեքտասաներորդի Կենարարին և Փրկչին մերոյ Յիսուսի Քրիստոսի» նախադասությունը հետագա հավելում է։

²⁸ Ս և Ե ր և ո ս, էջ 15։

²⁸ Կողմնակիորեն նկատենք, որ դա կարելու հանգամանք է Սեբեոսի և Անանունի հարաբերության հարցում։

մահը, անմիջապես ավելացնում է. «Եւ տիրէ ի վերայ աշխարհիս հայոց Արտաշիր արքայ պարսից, ամս ԺԱ»²⁹, տասնմեկ տարի:

Շապուհ I-ի մահից հետո Որմիդդ-Արտաշիրը գահը ժառանգեց 272 թ. և, եթե տասնմեկ տարով ետ գնանք, ապա Հայաստանը տիրել է 261 թ.: Այստեղ, Սերենոսն ինքն է հաստատում KZ արձանագրության տվյալը և նրանից վրաստահություն ձևաբերում: Իսկ Խորենացու մոտ «ժամանակս անիշխանութեան» կամ Արտաշիրի գահակալությունը Հայաստանում սկսվում է նույն թվականից (261), և 27 տարի հետո՝ 286/7-ին թագ է ստանում Տրդատը:

Աղբյուրները համերաշխ են:

Վերադառնում ենք ավանդույթին: Միշտ չէ, որ ավանդույթի խախտումը կարելի է դիտել իբրև գիտական խիզախում:

Սերենոսի և Խորենացու ժամանակագրության միջև մնում է մի անհամաձայնություն: Սերենոսի հաշվումներով Տրդատի գահակալությունն ընկնում է ոչ 298, բայց և ոչ 286/7 թ., այլ՝ 275-ին, որ Ավրելիանոսի վերջին տարին է, իսկ 276-ին կայսր է հռչակվում Պրոբոսը:

Ուխտանեսը թողել է մի հետաքրքիր դիտողություն. «Գրեցաք ի մերումս պատմութեան միանգամ և երկիցս յաղագս Տրդատայ թագաւորելոյն, թէ երբ և յորում ժամանակի եղև: Բայց ոչ միաբանէին ընդ միմեանս Զենոբ և Մովսէս վասն նորա. զի Զենոբ ի Պոռայ ասէ թագաւորեալ Տրդատայ. և թագաւորեալ յորժամ զգթացն արար ձերբակալ վթագաւորն. և նա երախտահատոյց լեալ Տրդատայ՝ թագ եղեալ թագաւորեցոյց զնա, և առաքեաց զօրօք իւրովք ի Հայս: Իսկ Մովսէս ի Դիոկղեսիանոսէ ասէ թագաւորեալ, վկայէ և այսմ զիրք Կայսերացն»³⁰:

Զենոբը գտնում է, որ Պրոբոսն է թագ տվել Տրդատին: Պրոբոսի կողմից Տրդատի թագադրության մասին հիշում է նաև Վարդան պատմիչը. «Պրոբոս, ամս 6: Ոմանք ասեն, թէ սա պսակեաց զՏրդատ»³¹: Այդ մասին մատենագրական վկայությունները բավական շատ են, որ կարելի լինե՞ր անտեսել:

Հետևենք իրադարձություններին:

Վալերիանոսի դերումից հետո պարսկական զորքերը գրավելով Անտիոքը հասնում են Կիլիկիա և Կապադովկիա: Հայկական գահին տիրում է Արտաշիրը: Հռոմեական Արեւելքում հրապարակ է գալիս նոր ուժ՝ Պալմիրան (Բաղմոր), սրի իշխան Սոլեմատոսը խլում է Պարսկաստանի զրեթե բոլոր արևմտյան նվաճումները: Նա հասնում է մինչև Տիգրոս:

«Ամենայն հավանականությամբ այդ ժամանակ Հայաստանը ևս վերադարձվեց Հռոմի իշխանության տակ», — դրում է Մոմզենը: Այդպես են ենթադրում և ուրիշներ: Բայց հենց ինքը Մոմզենը ծանոթագրում է. «Ալդուիսի եղրակացություն կարելի է անել ելնելով իրերի ընդհանուր դրությունից, բայց փաստական ապացույց չունենք: Այդ դարաշրջանի կայսերաց կենսագրություններում հայերը սովորաբար հիշվում են Հռոմից անկախ սահմանային ժողովուրդների մեջ (Vita Valer., 6, Frig tyr, 30, 18, Vita Aurel., 11, 27, 28, 31): Բայց բոլոր այս հիշատակությունները բովանդակում են կենսագիրների

²⁹ Սերենոս, էջ 15:

³⁰ Ուխտանեսու պիսկոպոս, Պատմութիւն Հայոց, Վաղարշապատ, 1871, էջ 111:

³¹ «Մեծին Վարդանայ Բարձրաբերդցոյ Պատմութիւն տիեզերական», Մոսկվա, 1861, էջ 56:

բոլորովին անվստահելի բաժիններում, որոնք նպատակ ունեն դունազարդելու իրականությունը»³²:

Իրերի ընդհանուր դրությունից թերևս կարելի է ենթադրել, բայց ազբյուրները ոչ մի հիմք չունենին հակառակը վկայելու: Հայաստանը Հռոմից անկախ ներկայացնելը կայսերաց կենսագիրների համար իրականությունը գունազարդել չի նշանակում:

Օղենատուսը չի նեղել Հայաստանին, հավանաբար նրա մեջ տեսնելով ապագա դաշնակցի Հռոմի դեմ, որի հետ բախումն անխուսափելի էր: Եվ երբ Ավրելիանոսը արշավեց Պալմիրայի վրա, վերջինիս դաշնակիցն էր և Հայաստանը:

Ջենոբիան, որ Օղենատուսի կինն էր և հաջորդը, պարտվում է, և վերականգնվում են Հռոմի իրավունքները ասիական սահմաններում:

Հենվելով «Կայսերաց գրքի» վրա, Մանանդյանը ենթադրում է, որ Ավրելիանոսի հաղթանակի առթիվ Հայաստանը ևս անցավ Հռոմի տիրապետության տակ կամ ընդգրկվեց նրա ազդեցության ոլորտը: Բայց բերենք մեզ հետաքրքրող հատվածները:

«Հաղթողը և արդեն ամբողջ Արևելքի տերը, որ շղթաների մեջ էր պահում Զենոբիային, պարսիկներին, հույերի և սարակինոսների հետ բանակցությունների ժամանակ, զործի բերումով, որ ելնում էր այդ շրջանի դրությունից, սկսեց ցուցաբերել չափազանց մեծ բարձրամտություն և զոռոգություն» (SHA, XXVI, XXVIII, 4):

«Այդպիսի կոչումն անվայել թվաց այն դեպքում, երբ նա արդեն անվանվում էր զոթական, սարմատական, հույկական, պարթևական և ադիաբենական» (SHA, XXVI, XXX, 5):

«Նա տվեց մեզ Դալիան, նա ազատագրեց Իտալիան, բարբարոսների լծից ու ստրկությունից նա փրկեց վինդլիկներին, նրա հաղթանակներով վերականգնվեց Իլլիրիկումը, վերագարծվեց Հռոմի օրենքներին Թրակիան, ետ բերվեց մեր իշխանության տակ Արևելքը, որ հեծում էր, ինչպիսի ամոթանք, էնոջ լծի տակ, պարսիկներին, որոնք մինչ այդ պարծենում էին Վալերիանոսի սպանությամբ, նա ջախջախեց, փախուստի մատնեց, խորտակեց: Սարակինոսները, բլեմմիները, ակսոմիտները, բակտրիացիները, սեռերը, վրացիները, ադվանները, հայերը, նույնիսկ հնդկական ժողովուրդները հարգում էին նրան գրեթե ինչպես աստծո» (SHA, XXVI, XLI, 8—10):

Այստեղ չկա այնպիսի բան, որ թույլ տա ենթադրելու, թե Հայաստանը անցավ Հռոմի իշխանության տակ: «Ամբողջ Արևելքի տեր» դարձվածքը անորոշ է: Արևելքը կարող էր ընդգրկել տարբեր սահմաններ: Մի ուրիշ անգամ նա Ավրելիանոսին հայտարարում է «ամբողջ աշխարհի տեր» (SHA, XXVI, XXXII, 4): Ավրելիանոսը, հաղթելով Պալմիրային, իրեն կարող էր համարել և նրա դաշնակիցների՝ պարսիկների և հույերի հաղթող և ստանալ «հայկական» մականունը: Եթե դրանով մտածենք, որ Հայաստանը ընկել էր հռոմեական գերիշխանության տակ, ապա նույնը կարելի է ասել և Պարսկաստանի մասին, բայց այդպիսի բան չի եղել: «Հարգում էին նրան գրեթե ինչպես աստծո» նախադասությունը բարոյական իմաստ ունի: Հարգողների մեջ թվում է նաև բակ-

32 Моммзен, История..., т. 397.

ուրիացիներին և Հնդկաստանի ժողովուրդներին, որոնք Հռոմի տիրապետության տակ լինել չէին կարող:

Այս ընդհանուր գովերգական շեշտը ավելի շուտ ասում է, որ Զենոբիայի դեմ Ավրելիանոսի հաղթանակը Արևելքի քաղաքական սահմանագիծը չփոխեց³³:

Խորենացին հաղորդում է, որ Վալերիանոսից հետո, Կլավդիոս II-ից մինչև Փլորիանոս («Փղոռիանոս») կայսրերը ոչինչ չկարողացան անել «հույ ընդ հույ փոխանորդելով դմիմեանս»³⁴, և Արտաշիրը ամրացավ Հայաստանում:

Խորենացին ճիշտ է տալիս նրանց հաջորդականությունը, հիշելով նույնիսկ կայսրերի, որ մեկ տարուց պակաս են իշխել: Նա ունեցել է ստույգ աղբյուր, որը համապատասխանում է արտաքին պատմիչների տեղեկություններին: Խսկ Արտաշիրը, ինչպես հայտնի է ԿՀ արձանագրությունից, Որմիզդն է, Շապուհի որդին: Այնպես որ այստեղ անախրոնիզմ չկա: Իրադարձությունները տնսխալ արտացոլված են պատմիչի մոտ:

Ավրելիանոսը, օգտվելով Զենոբիայի դեմ տարած իր հաղթանակից, թերևս կարող էր Եփրատն անցնել: Նա այդպիսի փորձ չարեց, որովհետև Հռոմի ել-

33 Մանանդյանը բերում է և ուրիշ փաստարկներ. Զոսիմոսը հաղորդում է, թե 272 թ. հաղթություններից հետո Ավրելիանոսը միացրել է Հռոմին Միջագետքը (Zosimos, 60, 1): Դա թերևս ղեկ չի նշանակում, որ Հայաստանն էլ է միացել: Եթե այդպես լինել, Միջագետքի հետ կոնիշեր և Հայաստանը: Ուշագրավ է նաև, — շարունակում է Մանանդյանը, — որ Ավրելիանոսի հաղթահանողական մասնակցած ժողովուրդների այն շարքում, որ անկախ էին Հռոմից, չեն հիշատակված հայերը (Vopiscus, Aurelianus, 33): Այդ, ինչպես կարծում են, կարող է դարձյալ մի նշան համարվել, որ Հայաստանն այդ ժամանակ գտնվում էր Հռոմի հովանավորության տակ» (99): «Ինչպես կարծում են», — Մանանդյանը նկատի ունի Աստուրյանին և նշում է նրա երկը: Բայց Աստուրյանի մոտ ասված է. «Միջագետք դարձյալ հռոմեական ազդեցության տակ մտավ: Հայաստան հավանաբար պարսկական ազդեցության շրջանակին մեջ մնաց, առանց որ այդ ազդեցությունը շատ մեծ բլլար նման վիճակի մը մեջ. ինչպես հաճախ Օգոստոսի ժամանակ, — և Ավրելիանոս Պարսից և Հայոց հետ իբր անկախ և իբր ոչ հովանավորի ժողովուրդներ վարվեցավ: Ո՛չ հաղթանակի մեջ տարվող և ո՛չ ալ հաղթանակի հանդիսին ներկա գտնվող ժողովուրդներու մեջ հայոց անունը կհիշատակվի, որ անով կարելի է մեկնել, թե Հռոմի գանձեր իբր իրեն հովանավորյալները կնկատեն. թեև իրականին մեջ այնպես չէին» (էջ 249):

Եթե հայերը չեն հիշվում ո՛չ հաղթանակի մեջ տարվող և ո՛չ էլ հաղթանակի հանդեսին ներկա գտնվող ժողովուրդների մեջ, շատ ավելի կարող է նշանակել և, թերևս, ուղղակի նշանակում է, որ նրանք Հռոմի ազդեցությունից դուրս էին:

Բայց և՛ Աստուրյանը, և՛ Մանանդյանը հիմք չունեն Վուպիսկոսի բնագրում հայերին փնտրելու հաղթանակի հանդեսին ներկա գտնվող ժողովուրդների մեջ, որովհետև Վուպիսկոսը առհասարակ նրանց չի հիշում, այլ խոսում է միայն գերիներին և նվաճված ժողովուրդների մասին: «Առջեվից դնում էին բսան փիղ, 200 վարժեցված զանազան վայրի կենդանիներ՝ Լիբիայից և Պալեստինից, չորս վագր, բնծուղտներ, իշայծամներ և ուրիշ նման գաղաններ. լրիվ կարգով. ութնալուրս գույզ գլադիատորներ, չհաշված բարբառոսական ցեղերից գերիներին, բլեմմիներ, ալսոմիտներ, արարներ՝ երջանիկ Արարիայից, հնդիկներ, բակտրիացիներ, իբերներ, սարակինոսներ, Պարսիկներ. — բոլորը իրենց երկրների ստեղծագործություններով. գոթեր, ալաններ, ոոկսոյաններ, սարմատներ, ֆրանկներ, սվեվներ, վանդալներ, գերմաններ, որպես գերի. կապված ձեռքերով: Նրանց մեջ առջևից բայում էին և Պալմիրա քաղաքի կենդանի մնացած ամենաանվանի դեմեր և եգիպտացիներ ի պատիվ նրանց ապստամբության» (SHA, XXVI, XXXIII, 4—5): Այդ առթիվ Վուպիսկոսն այլևս ոչինչ չի գրում:

34 Խ օ ր Ե ն ա ց ի, Բ—ՀԶ:

բուսական տիրապետություններում ղեկ գրությունը անկայուն էր³⁵։ Ավրելիանոսը շարժվեց Արևելք, այս անգամ Պարսկաստանի դեմ, 275 թ. միայն, բայց սպանվեց ճանապարհին, Բյուզանդիոնի մոտ։

Խորենացին ասում է, որ նրա հաջորդ Տակիտոսը «ընդդեմ Արտաշրի գայ զկողմամբ Պոնտոսի», բայց ապարդյուն. «Արտաշիր հասել ի Տակիտոս՝ ի փախուստ դարձուցանե՞լ»³⁶։

Դրությունը չի փոխվում և Պրոբոսի ժամանակ։ Նա 282 թ. իր լեզեոններն ուղղում է Արևելք, պարսիկների դեմ և նույնպես սպանվում ճանապարհին։

Զոսիմոսը 276 թ. համար, որ Պրոբոսի առաջին տարին է, նշելով հռոմեական Արևելքի սահմանները, Հայաստանը և Միջագետքը դուրս է թողնում։

Կարոսը բախվեց պարսիկների հետ և հասավ մինչև Տիգրոն։ Բայց արշավանքները ընդհատվեցին նրա խորհրդավոր մահով։ Լեզեոնները հեռացան Տիգրիսի ափերից, և նորից երկու տերությունների միջև սահմանն անցավ Ծփրատով։

Արևելքի քարտեզը վերագծվում է միայն Դիոկղետիանոսի օրոք։ Նա ապարդյուն չթողեց իր նախորդի հաղթանակները։ Նրա եռանդուն զործողությունները ստրակինոսների դեմ տպավորիչ էին, իսկ պարսկական արքունիքում նոր էր ավարտվել պայքարը գահի համար։ Համենայն դեպս, առանց պատերազմի խոհամիտ կայսրը կարողացավ լուծել Արևելքի խնդիրը՝ Միջագետքը և Հայաստանը ներգրավելով հռոմեական ազդեցության ոլորտը։

Եթե հենվենք Մամերտինի (կամ Եվմենիոսի) վրա, դա տեղի է ունեցել Դիոկղետիանոսի առաջին տարիներին, 289 թ. առաջ³⁷։ Դա լիովին համաձայն է Խորենացուն, որ Տրդատի գահակալությունը ղնում է Դիոկղետիանոսի երրորդ տարին։

Հետևելով պատմական իրադարձություններին, տեսանք, որ Վալերիանոսի ղերությունից մինչև Դիոկղետիանոսի՝ պարսիկների հետ համաձայնությունից (261—286/7), Հայաստանը դուրս էր Հռոմի ազդեցությունից, և այն ետ խլելու հռոմեացիների բոլոր փորձերը մնում էին ապարդյուն։ Դեպի Արևելք երթի մեջ կայսրերը հաճախ կորցնում էին իրենց կյանքը³⁸։ Դա հենց այն 27 տարին է, որ Խորենացին կոչում է «ժամանակս անիշխանության»։

Այսպիսով, բոլոր տվյալները հաստատում են պատմիչի վկայությունները։

Մանանդյանը գտնում է, որ Դիոկղետիանոսի և Պարսկաստանի միջև կայացված համաձայնությունից մասին պնդումները «վիճելի են և դժվար ընդունելի»։ «Պատմադիտական ուսումնասիրություններում, — դրում է նա, — օրինակ Մոմզենի, Տաշյանի, Խալաթյանցի և ուրիշների երկերում մատնանշվում

³⁵ «Ավրելիանոսը իր լեզեոնները շանցկացրեց նրա (Եփրատի) վրայով. բանի որ այդ ժամանակ Գալլիան Բրիտանիայի և Իսպանիայի հետ միասին ղեկեա հրաժարվում էին նրա իշխանությունն ընդունելու»։ (Моммзен. История..., էջ 397)։

³⁶ Խորենացի, Բ—2է։

³⁷ Panegyrici latini. XII, II (289 թ.), III (290 թ.), V (297 թ.), XII (299 թ.)։ Տե՛ս Моммзен. История..., էջ 398։ Schiller, Geschichte des röm Kaiserrechts unter der Regierung des vero 1872. Berlin, էջ 142։ Աստուրյան, Քաղաքական..., էջ 254—255։

³⁸ Դրանից արդեն վախ հարուցող նախապաշարում էր առաջացել. իբր մի ճակատադրական ուժ հռոմեական տիրակալին թույլ չի տալիս Տիգրոնից այն կողմ անցնելու, և Կարոսը կայծակնաճար եղավ, որովհետև համարձակվել էր կտրել ճակատադրով որոշված սահմանը (SHA, XXX, IX, 1)։

1. որ 283—286 տարիներում խաղաղության դաշն էր կնքված Վահրամ II-ի հետ և ըստ այդ դաշնագրության Հայաստանը տրվել էր Հռոմեական կայսրության: Սակայն այն պնդումները, որ հիմնված են Դիոկղետիանոսին վերաբերող ներբողական ճառերի կցկտուր ու մութ վկայությունների վրա, վիճելի են և դժվար ընդունելի»³⁹:

Panegyrici latini-ի տվյալները «կցկտուր ու մութ վկայություններ» չեն: Դրանք ներբողական ճառեր են, որ արտասանվել են կայսեր կենդանության ժամանակ: Կարող են, թերևս, գունազարդվել դեպքերը և չափազանցվել, բայց հնարվել՝ ոչ. դա լավ չէր ընդունվի իրազեկ ունկնդիրների կողմից: Խոսքը վերաբերում է կարևոր մի խնդրի, որ քառորդ դարից ավելի ծանրացած էր Հռոմի առաջ՝ Պարսկաստանի հետ Հռոմի քաղաքական հարաբերություններին: Դիոկղետիանոսի և Վահրամ II-ի միջև ինչ-որ պայմանավորվածություն եղել է, այլապես հոնտորը, որքան էլ ուզենար, չէր կարող իր հյուսած դափնուն մի շյուղ ավելացնել:

«Ավելի հավանական կարելի է համարել Աստուրյանի և Աննինսկու կարծիքը, — շարունակում է Մանանդյանը, — որոնք ենթադրում են, որ վերոհիշյալ թվերին օրինավոր դաշինք կնքված չի եղել»⁴⁰:

Աննինսկին՝ այո, բայց Աստուրյանը նման կարծիք չի հայտնել: Մանանդյանի նշած էջը (253) վերաբերում է Կարոսին⁴¹. այնտեղ Աստուրյանը գրում է. «Դիոկղետիանոսի զինված բազկով շատ անգամներ ինքզինքը ցուցուց Ասորիքի մեջ և հալածեց Սարակինոսներու խմբերը, որոնք հռովմեական երկիրը անհանգիստ կրնեին: Բր ներկայությամբ և իր զենքերուն ուժովը կայսրը այնպես սարսափեցուց տակավին միշտ ներքին շփոթություններով զբաղած Վոամը, որ սա բաբեկամության անունը ստանալու համար ամեն բանի մեջ տեղիք տվավ: Այս առթիվ տեղի ունեցավ եթե ոչ հանդիսավոր դաշինք մը, գեթ համաձայնություն մը, որուն համեմատ թագավորը իրականապես ճանչցավ, թե մինչև Տիգրիս տարածվող երկիրները հռովմեական են»⁴²:

«Բարեկամության անունը ստանալուն համար ամեն բանի մեջ տեղիք տվավ», — այս արտահայտությունը Աստուրյանը քաղում է նվմենիոսից (Paneg. Max., 10, Paneg. lat., II):

Աննինսկին գտնում է, որ Դիոկղետիանոսի և Վահրամ II-ի միջև դաշնագրություն տեղի չի ունեցել, և Միջագետքն ու Հայաստանը մնացել են Պարսկաստանի իշխանության տակ, Աստուրյանը՝ եղել է եթե ոչ դաշնագրություն, «գեթ համաձայնություն մը, որուն համեմատ» մինչև Տիգրիս տարածվող երկրները անցել են Հռոմին:

³⁹ Մանանդյան, Քննական..., էջ 102: Մեզ մնում է անհատականլի, թե ինչ հիման վրա է Մանանդյանը բերում 283—286 թվականները. Մոմզեևը որոշակի թիվ չունի (Момзен, История..., էջ 397—398), Տաշյանը այդ համաձայնությունը դնում է «286-ին վերջը» (Տաշյան, Ա., էջ 125), իսկ Խալաթյանցի մոտ խոսքը ոչ թե Դիոկղետիանոսի, այլ Կարինոսի դաշնագրության մասին է (Халатянц, Очерк..., էջ 345—346):

⁴⁰ Մանանդյան..., Քննական..., Բ., էջ 102:

⁴¹ Թեև Կարոսի պատերազմին ելքը հռովմայեցվոց նպաստավոր եղած էր, այսուհանդերձ օրինավոր դաշինք մը չկնքվեցավ երկու պետությանց մեջ, ուրեմն պարսիկը պաշտոնապես իրենց իրավունքն չհրաժարեցան հիշյալ երկու աշխարհներու վրա» (Աստուրյան, Քաղաքական..., էջ 253):

⁴² Նույն տեղում, էջ 254:

11 Հանդես, № 3

Որ Դիոկղետիանոսի առաջին տարիներին խաղաղ համաձայնությունամբ Միջագետքն ու Հայաստանը Պարսկաստանի գերիշխանությունից գուրս են մնացել, ցույց է տալիս մի շատ կարևոր աղբյուր՝ Ֆարկին — Տիգրանակերտի արձանագրությունը:

Արձանագրությունը հայտնաբերվել է 1899 թ. Լեման-Հաուպտի կողմից⁴³, Պատմագետները համաձայն են, որ այն վերաբերում է Տրդատ 111-ին և ոչ Պապին, ինչպես կարծում էր Լեման-Հաուպտը:

Արձանագրությունը չափազանց խաթարված է և հատվածային, բայց ընդհանուր առմամբ կարելի է որոշ գաղափար ստեղծել: Այն անպայման պրկած է հեթանոս թագավորի կողմից (A₂ նախնիների երջանկության (բախտի)..., A₃ որպեսզի մեր բախտի..., A₅ աստված արքայից արքա..., B₂ աստվածների հոգատարությամբ և մեր բախտի..., B₄ աստվածների հոգատարությամբ և երջանկության..., B₅ աստված արքայից արքայի..., B₆ աստված արքայից արքան... D₅ քաղաքների, որոնց աստվածների հոգատարությամբ և օգնությամբ...):

Արձանագրության մեջ խոսվում է հռոմեացիների նեկրայում ինչ-որ ուժ ձեռք բերելու մասին: Թագավորը պարսից արքայից հրովարտակ է ստանում, որ անակնկալ էր: Քաղաքը մինչ այդ անցել էր պարսիկների կողմը («Զեր քաղաքապետությունը և պատերազմում էր պարսիկների հետ իմ հոր ղեմ», C₃): Թագավորն իբրև պատիժ քաղաքը հանձնում է իր զորքերի ձեռքը («Բայց պետք չէ զրավված բերդը ամայի թողնել: Այդ իսկ պատճառով այն հանձնեցինք մեր զորքին, որպեսզի հանկարծ շհետևի ավելի մեծ խաչատառակություն, կամ ինչ-որ մասը դարձյալ ապստամբի և պատերազմի», C_{1, 5}):

Արձանագրությունը, թերևս, պարսից արքայի հրովարտակի պատճենն է. «Հրամայեցինք ինչպես որ էր դրության մեջ փորագրել և ամրացնել» (D₆, 7): Այդպես են վերջին տողերը: Նույնը նա փորագրել է տալիս և ուրիշ քաղաքների դարպասներին:

Ամբողջ արձանագրությունից երևում է, որ ինչ-որ համաձայնություն է եղել պարսիկների և հռոմեացիների միջև, և Տիգրանակերտը հանձնվել է հայ թագավորին: Բայց և՛ բ և ի՞նչ հանգամանքներում:

III դարի վերջին տասնամյակներին, որ Տրդատի դահակություն հավանական շրջանն է, պատմագրության մեջ հիշվում է երեք համաձայնություն կամ դաշինք. Պրոբոսի (276—282) կամ Կարոսի (282—283) իշխանության ժամանակ, Դիոկղետիանոսի (284—305) առաջին տարիներին և Գալերիոսի հաղթանակից հետո, 297/8 թվականին:

Վուպիսկոսը հաղորդում է, որ Պրոբոսը խաղաղություն կնքեց պարսիկների հետ (SHA, XXVIII, 17—18): Նման տեղեկություն ունի և Սյունեսիոսը (De regno, c 18): Այդպիսի հաշտություն կարող էր լինել: Դա թելադրում էր զոթերի վտանգը:

Սյունեսիոսը պատմում է, որ Կարինոսը (283—285), երբ Հայաստանի վրայով հասել էր Պարսկաստանի սահմաններին, նրանց հղած ղեսպաններին հետ է ուղարկում: Գուղշմիզը, Տաշյանը⁴⁴ և ուրիշներ կարծում են, որ դա նույնն

⁴³ C. F. Lehmann-Haupt, Armenien Einst und Jetzt, Berlin, 1910, էջ 111—119: Արձանագրության հունարեն բնագրից օգտվել ենք Հ. Բարթիկյանի թարգմանությամբ:

⁴⁴ ZDMG, XXXI, 50, Տաշյան, Աղաթ., էջ 119:

է Վուպիսկոսի հաղորդման հետ և պետք է վերաբերի Պրոբոսին: Մոմզենը գրում է. «Ինձ հասկանալի չէ, թե ինչու այդ պատմությունը կարելի է վերագրել Պրոբոսին, ինչպես դա մտածում է Գուղշմիդը: Այդ պատմությունը Կարոսի պարսկական արշավանքին լիովին հարմար է դալիս»⁴⁵:

Կարծում ենք Մոմզենի դիտողությունը տեղին է, և եթե անվան մեջ (Կարինոս) կա վրիպում, ապա պետք է լինի Կարոս, այլ ոչ՝ Պրոբոս:

Բայց դա չի մերժում Վուպիսկոսին, չնայած կա և ուրիշ առիթ: Կենսագիրն այդ պեպքը պատմելիս՝ տալիս է Ներսեսի անունը, իսկ Պրոբոսի ժամանակ պարսից զահին էր Վահրամ II-ը: Ներսեսը դահ բարձրացավ միայն 293 թ.:

Թվում է Վուպիսկոսի տվյալը պետք է ուղղել Սյունեսիոսի միջոցով, կամ անախրոնիզմը վերացնելու համար փոխադրել 293 թ. հետո, թերևս 297/8 թ.: Բայց նկատենք մի ուրիշ հանգամանք:

1924 թ. Հերցֆելդը հրատարակում է Պայկուլիի արձանագրությունը, որը փորագրել է տվել Ներսեսը⁴⁶: Այդ հրատարակությունը մեզ չէր կարող օգնել բայց Հենինգի վերընթերցման մեջ, 1952 թ., կա կարևոր մի լրացում. «Գենսպանը եկավ ինձ մոտ [ասելու], — գրված է այնտեղ, — կարող է նորին մեծություն արքայից արքան Հայաստանից գնալ Իրանշահր և ընդունել աստվածներից իր նախնիների պատիվը, գահը, իրավունքը և իշխանությունը... Եվ երբ տեսանք այդ նամակը, ապա հանուն Ահուրա Մազդայի և բոլոր աստվածների և Տիրուհու՝ Անահիտի, գնացինք Իրանշահր»⁴⁷:

Ներսեսը 293 թ. Հայաստանից է գնացել գահը ժառանգելու: Նույն արձանագրության մեջ նա իրեն կոչում է Հայաստանի թագավոր. «Ես Հայաստանի թագավորն էի», — գրված է արձանագրության առաջին տողերում:

Անիշխանության շրջանում հորենացին հիշում է միայն երկու Սասանյան գահակալ. Արտաշիր և նրա որդին: Բայց 272 թ. Արտաշիրը կրեց արքայից արքայի թագը, իսկ որդին KZ արձանագրությունից բացի ոչ մի տեղ չի հիշվում: Մատենագրական միակ տեղեկությունը հավանաբար հորենացու մոտ է: հորենացին նրան կոչում է Շապուհ և ասում, որ նա գահակալեց մեկ տարի: Այդքան կարճատև ժամանակը և Շապուհի մասին պարսկական աղբյուրների հետագա լռությունը համաձայն են իրար, նկատել տալով, որ հորենացին ճիշտ է և Ումիդ-Արտաշիրի որդին հավանաբար վախճանվել է վաղաժամ:

Մինչև 273 թ. մարտ ամիսը Արտաշիրն իր զրամները թողարկում է «Հայաստանի մեծ թագավոր» մականգրությամբ⁴⁸. ուրեմն նրա որդին իբրև «Հայաստանի մեծ թագավոր» իշխել է 274 թ., և Ներսեսը նրան պետք է որ հաջորդեր 275-ին:

262 թ., KZ արձանագրության համաձայն, Ներսեսը թագավորն էր «Սակաստանի, Թուրանի և Հնդկաստանի, մինչև ծովի ափերը»: 276 թ. Վահրամ

⁴⁵ Mommsen, *Historia*..., էջ 397:

⁴⁶ E. Herzfeld, *Patkul. The Monument and Inscriptions on the Early History for Sasanian Empire*, vol. I—II, Berlin, 1924.

⁴⁷ W. Henning, A Farewell to the Khagan of the Aq-Aqataran, *SLB Bulletin of the School of Oriental and African Studies, University of London*, XIV, էջ 517—518:

⁴⁸ B. Г. Туконин, *Культура Сасанидского Ирана*, М., 1969, էջ 101—102:

1-ի մոտ Մանիի ընդունելությունը Կարտիրի հետ մասնակցում էր և «Սակերի թագուհին»։ «Իժվար՝ է պատկերացնել,— գրում է Լուկոնինը,— որ Վահրամ 1-ի պալատում նրա մերձավորների մեջ գտնվեր իրեն թշնամի ներսեհի կինը։ Զէ որ ներսեհը Վահրամ 1-ին համարում էր գահի «ուղուրպատոր»⁴⁹։ Եթե ճիշտ է Լուկոնինը, ապա պետք է ընդունել, որ ներսեհը արգեն 276 թ. Սակերի թագավոր չէր և կրում էր «Հայաստանի թագավոր» տիտղոսը։ Համենայն դեպս, ա լիովին համընկնում է Խորենացու տվյալներին։

Այսպիսով, ներսեհը 275/6 թ. փոխարինել է Որմիլդ-Արտաշիրի որդուն՝ Շապուհին (թերևս Որմիլդակին, ինչպես ասված է KZ արձանագրության մեջ) և հաշտություն առաջարկել Պրոբոսին, որ նույն ժամանակներում՝ 276 թ., կայսերական ծիրանի հագավ։ Դրանով, թերևս, նա շտապում էր Հռոմի նոր կայսեր իր վերաբերմունքն արտահայտել և նրա կողմից ճանաչում ստանալ։ Բայց համաձայնություն Պրոբոսի և ներսեհի միջև չեղավ, Մակդերմոտի ենթադրությունը հակառակ⁵⁰։ Դա պարզ է Վուլիսկոսի հաղորդումից։ Համաձայնություն տեղի է ունեցել Պրոբոսի և արքայից արքա Վահրամ 11-ի միջև։ «Պարթևները հղեցին ղեսպաններ, ընդ որում, խոստովանելով, որ վախենում են նրանից և խնդրեցին խաղաղություն,— գրում է Վուլիսկոսը,— նա նրանց ընդունեց բարձրամտությամբ և ետ դարձրեց շատ ավելի վախեցրած»⁵¹։ «Եվ այդպես, պարսիկների հետ խաղաղություն կնքելով, Պրոբոսը վերադարձավ Թրակիա»,— ասված է շարունակության մեջ։ Թվում է, թե խոսքը համաձայնության գալու մասին է։ Նրկու նախադասությունները, սակայն, միմյանց հետ ոչ մի կապ չունեն։

Նկատենք, որ Պրոբոսին հաշտություն են առաջարկել պարթևները, իսկ նա խաղաղություն է կնքում պարսիկների հետ։ Վուլիսկոսը պարսիկներին և պարթևներին տարբերակում է։ Նույն Պրոբոսի կենսագրության մեջ կարդում ենք. «էլ ինչ ասենք սարմատների, գոթերի, պարթևների, պարսիկների, ամբողջ մերձպոնտյան շրջանի մասին։ Ամենուր կգտնվեն Պրոբոսի մեծագործության փայլուն հետքերը»⁵²։ Ինչպես տեսնում ենք, Վուլիսկոսը պարթևներին ու պարսիկներին թվարկում է իրար կողքի։ Այդպիսով, Պրոբոսը մերժել է ոչ թե պարսիկների, այլ պարթևների խաղաղության առաջարկը։ Պարթևներ ասելով՝ Վուլիսկոսը նկատի ունի Հայաստանը, որ պարթևական իշխանության վերջին հենարանն էր։ Արշակունիների տապալումից հետո Բրանից այստեղ էր տեղափոխվել պարթև ավագանին, և պարթևական տարրը քաղաքական ազդեցություն ուներ, անկախ այն բանից, թե ով էր գահակալը։

Պրոբոսը, ետ տալով ներսեհի նվերները, գրում է. «Ես դարմանում եմ. որ այն ամենից, որ մերը կլինի, դու այնքան քիչ ես ուղարկել։ Տիրիք առաջմ բոլորին, ինչ քեզ ուրախություն է պատճառում։ Եթե մենք ցանկանանք ունենալու այդ ամենը, ապա մենք դիտենք ինչ ճանապարհով կարող ենք ձեռք

⁴⁹ В. Г. Луконин, Культура..., էջ 108.

⁵⁰ Brian Mac Dermot, The Conversion of Armenia in 294 A.D. («Revue des études Armeniennes», VII, 1970, էջ 284)։ Մակդերմոտը անիշխանության շրջանը հաշվում է Շապուհի գահակալության վերջին տարիներից մինչև 293 թ.։ Նրեմյանը՝ 237—287 թթ. (տե՛ս «Պատմա-քանասիրական հանդես», 1966, № 2, էջ 68)։

⁵¹ SHA, XXVIII, XVII, 4.

⁵² SHA, XXXVIII, XII, 4.

բերել դրանք»⁵³, Այդպիսի նամակ նա չէր հղի արքայից արքային: Դա չափազանց կի՛ննե՛ր: Այս նամակում լրիվ արտահայտված են Հայաստանի նկատմամբ կայսեր վերաբերմունքը և քաղաքական նկատառումները: Նա փաստորեն չի ընդունում Ներսեհի գահակալական իրավունքները:

«Յունաց թագաւորեաց Պրոբոս և խաղաղութիւն արարեալ ընդ Արտաշրի՝ բաժանէ զաշխարհս, սահմանադրութեամբ փոսս գործելով»⁵⁴, — գրում է հոփնայցին:

Որ Պրոբոսը պարսից արքայից արքայի հետ խաղաղություն է կնքել, համալատասխանում է արտաքին աղբյուրների տվյալներին, բայց հոփնայցու «բաժանէ յաշխարհս» արտահայտությունը Պրոբոսին չի վերաբերում: Ազաթանգեղոսը պատմելով, որ Տրդատին դայակները փախցրին «ի դուռն կայսեր ի կողմանս Յունաց», գրում է. «Եւ զերկիրն Հայոց այնուհետեւ եկեալ արքային Պարսից յիւր անուն ղտեղիսն անուանէր, և զդօրսն Յունաց փախստական արարեալ հալածական տանէին մինչև ի սահմանս Յունաց: Վիհս փոսացուցեալ՝ սահմանս հաստատէին»⁵⁵: Ազաթանգեղոսի այս հաղորդումը, որ անվամ է, հոփնայցին կապում է Պրոբոսի պայմանագրության հետ: Խաղաղությունը Պրոբոսը միայն պահպանել է եղած դրությունը: Դա հուշում է այն, որ արդեն 262 թ. վերադառնում է Արեւելք, Պարսկաստանի դեմ:

Այն հանգամանքը, որ Ներսեհի կառավարման ժամանակ Հայաստանը փորձել է կայսեր հետ ինքնուրույն կապ հաստատել, ցույց է տալիս որոշ քաղաքական անկախություն: Դա մոտավորապես հիշեցնում է վաղ շրջանի Արշակունյաց Հայաստանը: Չնայած միևնույն դինաստիան էր, բայց Հայաստանը ներկայացնում էր առանձին պետականություն:

Անիշխանության շրջանի մասին («ի ժամանակս անիշխանութեան») հոփնայցին գրում է. «Իսկ Արտաշրի գեղեցկապէս յարդարէալ զաշխարհս Հայոց՝ ի կարգ առաջին հաստատէր: Նա և զԱրշակունիսն, զմեկուսացեալսն ի թագէն Լ: յԱյրարատն բնակելոյ, կարգէ ի նոյն տեղիս մտիւք և ոռճկօք» (Բ—Հէ): Խոսքը վերաբերում է Սասանյան Ուրմիզդ-Արտաշիրին, թե Ներսեհին, որ նրա հաջորդն էր հայկական գահի վրա, բայց նկատենք, որ «ի կարգ առաջին հաստատէր», այսինքն, պահպանում է ինչպես որ էր Արշակունյաց ժամանակ:

Խաղաղություն կնքելով Պարսկաստանի հետ, Պրոբոսը գնում է Թրակիա: Հոմեր չի ուզում Հայաստանի նկատմամբ ոչ մի պարտավորություն վերցնել: Դա, թերևս, հենց այն հավանական պահն է, երբ Տրդատը հռոմեական զորքերով ուղղվել է Հայաստան: Կարելի է հավանական համարել նաև, որ Տրդատին՝ 275 թ. Հայաստան է ուղարկել հենց Ավրելիանոսը: Նրան հռոմեական զորքերով Պարսկաստանի դեմ հանելը համապատասխանում էր կայսեր շահերին: Ավրելիանոսը կրում է նաև Լիկինիոս անունը, իսկ Տրդատը, ինչպես հայտնի է, ապաստան էր գտել Լիկինոսի մոտ, որ կարող էր հենց Ավրելիանոսը լինել:

Տիգրանակերտի արձանագրությունը, սակայն, այս դեպքերին չի կարող վերաբերել: Այնտեղ արքայից արքան թագավորին հանձնում է քաղաքը առանց

⁵³ SHA, XXVIII, XVII, 5:

⁵⁴ Խոփնայցի, Բ—Հէ:

⁵⁵ Աղաթ., Գ—36:

րնդհարման և, հասկանալի է, նրան ճանաչում իբրև Հայաստանի տիրակալ: Իսկ Ագաթանգեղոսը և Խորենացին վկայում են, որ Տրդատը Հայաստան մտավ «մեծաւ զորու» (Խորենացի): Նա աչքի է ընկնում հռոմեացիների մոտ, և կայսրը ուղարկում է Հայաստան. «Գումարեաց ի ձեռս նորա զօրս բազումս յօդ-նականութիւն նմա և արծակեաց յիւրական աշխարհն հայոց» (Ագաթանգեղոս):

Արձանագրության մեջ խոսքը վերաբերում է ինչ-որ հաշտության կամ խաղաղ վիճակի, բայց Պրոբոսի կողմից Տրդատին Հայաստանի դեմ ուղղելը հաշտության հետ ոչ մի կապ չունի: «Խաղաց գնաց թագաւորն ի կողմանս Հայոց, և եկն եգիտ տնդ զօրս բազումս Պարսից, զի զաշխարհն յինքեանս գրաւեալ էին ի ծառայութիւն,— գրում է Ագաթանգեղոսը,— զբազումս կոտորէր, և զբազումս փախստականս արարեալ ի կողմանս Պարսից արկանէր. և զհայրենեացն տէրութիւն յինքն նուաճեաց, և զօրացաւ ի վերայ սահմանաց նորա»⁵⁶:

«Տրդատ Գ-ի վերադարձի ու թագավորման մասին Հայաստանում հայտնի է խիստ կարեւոր մի աղբյուր՝ Ֆարկին—Տիգրանակերտ քաղաքի պարսպի վրա գտնված հունարեն արձանագրությունը»⁵⁷,— գրում է Մանանդյանը, բայց չի նշում, թե ինչով է այն կարեւոր և ինչպես է առնչվում Տրդատ 111-ի վերադարձի և թագավորման հետ: Նա արձանագրությունը վերագրում է 298 թ. հաշտությանը, գրելով. «Տրդատ Գ-ի այս արձանագրության ժամանակը պետք է ենթադրել երրորդ դարի վերջերում, հավանորեն 298 թվին»: Կարծում ենք, որ արձանագրությունը դրան ևս չի վերաբերում: 297 թ. հաշտությունը հռոմեացիների կողմից Ներսեհի դեմ Մեծ Հայքում⁵⁸ տարած հաղթանակի հետևանքն էր, իսկ Փավստոս Բուզանդի վկայությամբ՝ Բասենում («Ի գաւառին Բասենոյ ի գիւղն, որ անուանեալ կոչի Ոսխայ»)՝⁵⁹, բայց արձանագրության մեջ տեղի ունեցող զենքերը ինչ-որ ձևով կապվում են Նեկրայի հետ, որ կարելի է փնտրել Մեծ Հայքից դուրս, կամ, թերևս, նրա հարավ-արևմտյան սահմաններին⁶⁰, Առհասարակ 298 թ., որ առաջարկում է Մանանդյանը, պատմական այդ ընթացքի մեջ Տրդատի թագադրության ամենահարմար պահը չէ: Սերեոսի համաձայն, Դիոկղեսիանոսը ծիրանի է հագել 261 թ., իսկ Տրդատը՝ նրա 15-րդ տարում՝ 275-ին, որ ընկնում է Ավրելիանոսի և Պրոբոսի ժամանակները: Ինչ վերաբերում է հունա-հռոմեական աղբյուրներին, դրանք ևս այդպիսի հիմքեր չեն տալիս:

1. Ներսեհը 293 թ. ժառանգելով արքայից արքայի գահը, անմիջապես պատրաստվում է հռոմեացիների դեմ պատերազմի. «Ներսեհը նախ հռոմեական իրավունքի տակ գտնվող Հայաստանը գրավեց»,—նկատում է Ամմիանոսը: Ուրեմն մինչ այդ, մինչ 295 թ. (Ներսեհը հռոմեացիների դեմ պատերազմ է սկսել 295 թ.) Հայաստանը հռոմեական էր: Ավրելիոս Վիկտորն ասում է, որ Գալերիոսը Ներսեհի դեմ պատերազմի վայր ընտրեց Հայաստանը՝ «որն

⁵⁶ Ա. Գ. Կ. Բ. Գ. 47:

⁵⁷ Մանանդյան, Քննական..., էջ 120:

⁵⁸ Eutropius, Breviarium, IX, 24—25; Rufus Festus, Breviarium, XXV; Aurelius Victor, Caesares, XXXIX.

⁵⁹ «Փավստոսի Բուզանդացու Պատմություն Հայոց», Վենետիկ, 1914, էջ 79:

⁶⁰ Ս. Տ. Երևմյանը կարծում է, որ դա կարող է լինել Արշամաշատը, որ արարները կոչում են Նեքրա կամ Նաջարան:

ամուր հենարան է և հաղթության համար ավելի ճիշտ ճանապարհ»։⁶¹ Դա նույնպես հուշում է, թե պատերազմից առաջ Հայաստանը հռոմեական էր կամ, թեկուզ միայն, հակված էր դեպի նա։ Դրան պալիս է լրացնելու Ռուփուս Ֆեստուսի հաղորդումը։ Խոսելով Գալերիոսի հաղթանակի մասին, Ֆեստուսը գրում է. «Միջադեպը հինգ Անգրտիգրիսյան երկրների հետ նրանք ետ տվեցին։ Խաղաղություն կնքվեց և շարունակվում է մինչև մեր օրերը»։ Մեծ Հայքի մասին խոսք չկա, որ ետ են տվել, որովհետև այն արդեն պարսիկների ձեռքին չէր⁶²։ Առիթ կար Տրդատի դահակաման, և պետք չէր սպասել 297 թ. Հայաստանի վերագրավմանը։

2. Հաշտության պայմանները կարող էին ավելի ծանր լինել պարտված երկրի համար, բայց Դիոկղետիանոսը ղիջողություն է ցուցաբերում⁶³։ Այդ պայմանների մասին ավելի մանրամասն տեղեկանում ենք VI դարի պատմիչ Պետրոս Պատրիկիոսից։ «Դեսպանության ղլխավոր գրությունները հետևյալներն էին. Արևելքում հռոմեացիներին են պատկանելու Ինգիլենեն, Մոփքի, Աղծնիքի, Կորգոքի և Մավղեքի հետ միասին, Տիգրիսը լինելու է երկու երկրների սահմանը, Միգիայի սահմանին ընկած Զինթ ամրոցը լինելու է Հայաստանի սահմանը, Բերիայի թագավորը իշխանության նշաններ պետք է ստանա հռոմեացիներից, Արևելքում առևտրական հարաբերությունների կետը պետք է լինի Տիգրիսը, որ գտնվում է Տիգրիսի ափին»⁶⁴։ Այստեղ բավականաչափ խոսք կա Հայաստանի մասին, և եթե իսկապես Տրդատի թագադրության հարց լիներ, կամ նրա իշխանությունը ճանաչելու, անպատճառ կարտահայտվեր պայմանագրի մեջ, ինչպես, ասենք, իբրևների համար։

3. Տրդատի թագադրությունը կարևոր իրադարձություն էր. նախ՝ մեծ բնագմիջումից հետո Արշակունիները վերականգնում են իրենց գինաստիական իրավունքները և ապա՝ Տրդատն էր, որ պետական աստիճանի բարձրացրեց բրիստոնությունը։ Խիստ կարևոր էր և 297 թ. Գալերիոսի հաղթանակը, որով սկիզբ դրվեց շուրջ քառասունամյա խաղաղության։ Եթե Տրդատի թագադրությունը կապված լիներ Գալերիոսի հաղթանակի հետ, ապա դա չէր կարող մոռացվել։ Ե՛վ ավանդությունը, և՛ պատմությունը Տրդատի թագավորելը կապում են բոլորովին այլ դեպքի հետ, իսկ Գալերիոսի հաղթանակը սնունդ է տվել ուրիշ զրույցի, որ Տրդատի հետ չի առնչվում⁶⁵։

4. Եվ, վերջապես, համաձայն հայկական աղբյուրների, Տրդատը տիրեց Վահին, մարտնչելով պարսիկների դեմ, «զհայրենեաց տէրութիւն յինքն նուաճեաց» (Աղաթանգեղոս)։ Նա հռոմեական զորքերով Հայաստան է դալիս մենակ, իսկ 297 թ. համար դա բացառվում է։ Գալերիոսը, որ Դիոկղետիանոսի կայսերակիցն էր, ինքն է առաջնորդել հռոմեական լեգեոնները և տարել նշա-

⁶¹ Տե՛ս Н. Адонц, Фауст..., էջ 239։ Այս բոլոր հաղորդումները բնագրով և ողտերեն խմբագրված լինում են Ադոնցի հոդվածում («Христианский Восток», т. VI, 1922, էջ 235—272)։

⁶² «Հաղթանակն այնքան նշանակալից էր, որ եթե Վալերիանոսը (Դիոկղետիանոսը), որի հրամանով էր ամեն ինչ կատարվում, չհակառակվեր, անհասկանալի պատճառով, ապա հռոմեական իշխանությունը կտարածվեր նոր նահանգի վրա» (Aur. Victor, De Caesaribus, XXXI (տե՛ս «Христианский Восток», էջ 237)։

⁶³ Excerpta Petri Patricii, Ad gentes c-III (տե՛ս Христианский Восток, էջ 244—245)։

⁶⁴ Տե՛ս Փ ա վ ս տ ո ս Բ ու ղ ա ն դ, Գ—ԻԱ, էջ 77—80։

նավոր հաղթանակը: Դա հարազատորեն արտացոլված է հայկական զրույցում և չէր կարող վերադրվել Տրդատին:

Ինչպես տեսնում ենք, 297/8 թ. դաշնագրության հանգամանքները չեն առնչվում Ֆարկին-Տիգրանակերտի արձանագրության հետ:

Այժմ քննենք երրորդ հնարավորությունը:

Աղբյուրներից հավաստիանում ենք, որ Դիոկղեսիանոսը խաղաղ ճանապարհով հռոմեական դարձրեց Միջագետքը և Հայաստանը: Արձանագրության մեջ դա հաստատվում է: Արքայից արքան Տրդատին հղած մի հրովարտակով նրան է տալիս Տիգրանակերտը և ուրիշ քաղաքներ: Դա Արշակունի զահակալի համար «անսպասելի» էր: Նշանակում է, այդ քայլը հարկադրանքով չէր թելադրված: Թագավորը հարգալիիր և երախտագիտությամբ է խոսում և՛ հռոմեացիների, և՛ պարսից արքայի մասին, որին ընթեռնելի հատվածներում երեք անգամ կոչում է «աստված արքայից արքա» («Որպեսզի մենք երախտապարտ երևանք հռոմեացիների նկատմամբ և պարսից արքայից արքայի, որպեսզի...»): Դա ինքնին ցույց է տալիս, որ նրանք հանդես են գալիս որպես հավասար կողմեր: Եթե Տիգրանակերտի և ուրիշ քաղաքների հանձնումը 297 թ. դաշնագրության հետևանք լիներ, հայ թագավորը այդպիսի երախտագիտություն չէր արտահայտի պարսից արքայի նկատմամբ, որովհետև նա պարտված կողմն էր և քաղաքները զիջում էր հարկադրաբար: Իսկ արքայի անսպասելի նամակը ամենից առաջ հրովարտակ է Տրդատի թագավորական ստատուսը ճանաչելու, որ նա հրամայում է հյուսիսային զարպասի վրա փորագրել. «Մենք առավել զիտության համար հրամայեցինք զրերը»: Արձանագրությունը հաստատում է, որ դաշինք կամ պայմանավորվածություն է եղել պարսիկների և հռոմեացիների միջև և երկուստեք ճանաչվել են Տրդատի իրավունքները և որ դա կարող էր լինել Դիոկղեսիանոսի առաջին շրջանում (Եվմենիոս) կամ «յերրորդ ամի» (Խորենացի): Պատմագրությունը դա վերագրում է Դիոկղեսիանոսի անձնական հատկություններին: Դիոկղեսիանոսը, անշուշտ, խոհամիտ քաղաքագետ էր, սակայն երկու մեծ տերությունների միջև նման խնդիրներ լուծելու համար պետք է ավելի մեծ բան: Կարոսի հաղթանակը շատ նպաստավոր հանգամանք էր, որից չկարողացավ օգտվել նրա հաջորդը, բայց Կարոսի մահից հետո նվաճված երկրները ետ էին դարձվել, և Սասանյան տիրակալը հեշտությամբ չէր զիջի:

Այստեղ զեր ունեն այլ նկատառումներ: Վահրամ II-ը նոր էր հաղթահարել իր կնոջ եղբոր և Խորասանի արքա Ուրմիզդի զահակալական նկրտումները, երբ գալիս է դաշնակցելու Դիոկղեսիանոսի հետ: Պարթևների ժամանակ հայ զահակալը հաշվվում էր երկրորդը. «Զի որ Հայոց թագաւոր էր, նա էր երկրորդ Պարսից տէրութեանն»⁶⁵: Սասանյանները ուզում էին պահպանել միևնույն ստատուսը: Գահաժառանգը կրում էր Հայոց թագավոր տիտղոսը, եթե, նույնիսկ, չուներ իրական իշխանություն: Այդպես էր Ուրմիզդ-Արտաշիրը մինչև 261 թ., որի դեմ պայքարել է Խոսրովը: Արտաշիրն ուներ սեփական Կրակ (Հրատն) և հաջորդեց իր հորը⁶⁶: Նրա փոխարեն Հայաստան է մեկնում ներ-

⁶⁵ Ա. Կ. Թ., Ա.—18:

⁶⁶ «Գահի նկատմամբ Ուրմիզդ Արտաշիրի իրավունքը ոչ մեկի կողմից չփիճարկվեց» (P. Բ. Բ. Մ. Наследие Ирана, М., 1972, էջ 298):

սեհը: Նա, ինչպես հայտնի է KZ արձանագրությունից, նույնպես ատրուշան ուներ, ուրեմն՝ առանձնակի պիք և երկրորդն էր «տէրութեանն Պարսից»: Բայց Որմիզդ-Արտաշիրին գահի վրա հաջորդում են Վահրամ I-ը (274—276), որի համար KZ արձանագրության մեջ սեփական Կրակ (Հրատն) չի հիշվում, Վահրամ II-ը (276—293) և Վահրամ III-ը (293), իսկ Ներսեհը մնում է դուրս: Անշուշտ, դա չէր կարող բնական դիտվել հենց Ներսեհի կողմից: Ծավալվում է պայքար հավակնորդի և գահակալների միջև: Ներսեհը այդ պայքարում մեծ ջանքեր է գործադրել և կիրք: Պաշկուլիի արձանագրության մեջ նա իրեն կոչում է արքայից արքա, երբ դեռ Հայաստանում էր և չէր նստել իր նախնիների գահին: Մտածել, որ մինչ այդ, այսինքն՝ մինչ 293 թ., ինչ-որ ժամանակ նա կրել է պարսից թագը: Ո՛չ: Նա իրեն այդպես է կոչում, որովհետև չի ճանաչում Վահրամ III-ին իբրև գահակալ: Արձանագրությունը հենց այդ ոգին ունի: Կարծես գահին օտարներ էին տիրացել, իսկ նա դնում է ժառանգելու իր հայրերից. «Կարող է նորին մեծություն արքայից արքան Հայաստանից գնալ Իրանշահը և ընդունել աստվածներից իր նախնիների պատիվը, գահը, իրավունքը և իշխանությունը»: Բայց նա հենց ասում է, որ գահը իրեն կտակել է ուղղակի իր հայրը՝ Շապուհը: «Շապուհը... կտակեց, որպեսզի Իրանշահի վրա նա տիրակալ լինի», — ասված է արձանագրության մեջ: Եվ վերջապես՝ նրա միջոցով է ժառանգության աստվածներին զոհ տրվում Վահրամ III-ը, որ իր եղբոր թոռն էր:

Կա մի շատ բնորոշ վիաստ: Իշխապուրի արձանագրությունից Ներսեհը հնչել է տալիս Վահրամ I-ի անունը և իրենը գրում: Այդ նշանակում է, որ Որմիզդ-Արտաշիրից հետո ուղիղ գծով նա է իրեն համարում օրինական ժառանգորդ: Իսկ երբ դեռ միայն Հայոց թագավոր տիտղոսն էր կրում, թողարկել է դրամներ, որոնց վրա իր պատկերն է, գլխին՝ Վահրամ II-ի թագը⁶⁷: Դա բացահայտ արտահայտում էր այն միտքը, թե՛ թագի իսկական տերը Վահրամը չէ:

Հայաստանի որոշ անկախությունը և պարսիկների հետ շահագրգռությունների տարբերությունը ընդգծվում էր Ներսեհի և Տիգրանի գահակալների միջև եղած հակասության պայմաններում: Ներսեհը փորձում էր հենվել հայ Արշակունիների և ավագանու վրա, օգտվելով նրանց և պարսիկների միջև եղած հակասությունից, որ ընդունի «իր նախնիների պատիվն ու գահը»: Ինչպես տեսնում ենք, չնայած գահակալը Սասանյան էր, Հայաստանը, որի թագավորը կարող էր սեպարատ հաշտություն առաջարկել Հռոմին, Պարսկաստանի համար մնում էր վտանգավոր: Հենց այդ հանգամանքից մղված Վահրամ II-ը որոշում է քաղաքական ասպարեզ տալ Տրդատին և բարեկամություն հաստատել նրա հետ: Տրդատը կարող էր պարթևական ուժերը հանել Ներսեհի դեմ: Որ Վահրամը այդպիսի նկրտումներ է ունեցել, ցույց է տալիս Տիգրանակերտի արձանագրությունը: Վահրամ II-ը Տրդատին ուղղած հրովարտակով ճանաչում է նրան իբրև Հայաստանի թագավոր, իսկ Տրդատը երախտապարտ է և կոչում է նրան «աստված արքայից արքա»: Արշակունիների պայքարը Սասանյան գահի համար դառնում է անվտանգ:

Ինչպես տեսնում ենք, Իրանի և Հռոմի միջև համաձայնությունը միայն Դիոկղետիանոսի ժառանգությունը չէր: Այն ելնում էր և Պարսկաստանի շահե-

67. Луконин, Культура... էջ 180:

րից»⁶⁸։ Ազաթանգեղոսն ասում է, որ Տրդատը 13 տարի, «իբրև ամս երեքտասան» կուլում էր Պարսկաստանի դեմ։ Եթե Տրդատը դա՛հ է բարձրացել Դիոկղետիանոսի և Վահրամ II-ի համաձայնությամբ, կամ 298 թ. դաշինքով, ապա դժվար է տեղադրել այդ թիվը։ Տեղադրման այդպիսի փորձ անում է Տաշյանը. «Խաղաղություն կնքել են ետքն ալ կրնար Պարսից արքայն գրգռել զՏրդատ և ալս վերջինը մանր արշավանքներ ընել յԱտրպատական ևն»։ Նա նկատի ունի Դիոկղետիանոսի առաջին տարիների խաղաղությունը։ Այժմ պարզվում է, որ Տրդատը պայքարել է Պարսկաստանի, բայց ոչ Վահրամ II-ի, այլ Ներսեսի դեմ։ Այդ պայքարը թերևս խրախուսվում էր հենց իրեն՝ արքայից-արքայի կողմից։

Այժմ Ազաթանգեղոսի թիվը (13) հեշտությամբ կարելի է տեղակայել։ Ըստ Սերեոսի, Տրդատը Հայաստան է գալիս 275 թ., իսկ 286/7 թ. ճանաչվում է իբրև հայոց թագավոր։ 275-ից մինչև 287-ը, ուղիղ 13 տարի է։ Այդպիսով, մերժված 13-ը շատ կարևոր ծառայություն է մատուցում. Տրդատի գահակալության մասին նորից հավաստվում է պատմիչի ժամանակագրական ստուգությունը։

Ինչպես տեսանք, Ներսեսը Հայաստանի թագավոր տիտղոսը կրեց 275/6 թ.։ 293 թ. նա Հայաստանում էր, երբ սուրհանդակ եկավ իր մոտ։ 295 թ. իբրև արքայից արքա, Ներսեսը վերադառնում է Հայաստան, որը, Ամմիանոսի և մյուս հունա-հռոմեական պատմիչների վկայությամբ, չէր գտնվում պարսկական տիրապետության տակ։ Ամմիանոսի հաղորդումից չի երևում, թե 293—295 թթ. միջև այն հռոմեական դարձավ։

Հայաստանը հռոմեական էր և՛ 293 թ. առաջ, 293 թ. Ներսեսը ոչ թե տիրում էր Հայաստանին, այլ պայքարում՝ Հայաստանը նվաճելու համար, հենվելով հայ պարթևական առանձին շերտերի վրա։ Բարձրանալով Տիգրեոնի գահը, գրեթե անմիջապես նա շարժվում է Հայաստան։ Դա նկատել է տալիս, որ Ներսեսը իբրև արքայից արքա, ուղում էր իր պայքարը հաղթական ավարտի հասցնել, բայց հաջողություն չունեցավ։

Գալերիոսը 311 թ. հրովարտակում իրեն կոչում է «վեց անգամ հայերին հաղթող»⁶⁹։ Մնում է անհասկանալի, թե և՛րբ են եղել այդ հաղթանակները։ Աննինսկին և Մանանդյանը տալիս են այսպիսի բացատրություն. «Հայերի դեմ վեց հաղթանակ կարող էր լինել միայն 303 թ. առաջ և, ուղղակի, 297—302 թթ. միջև։ Եթե Գալերիոսին պետք եղավ տանել վեց հաղթանակ, ցույց է տալիս, որ հայերը եռանդուն պաշտպանվում էին Հռոմի դեմ»⁷⁰։ Թե ինչու Գալերիոսի հաղթանակները տեղակայվեցին 297—302 թթ. միջև, դժվար է հասկանալ։

⁶⁸ Աննինսկին, Մանանդյանը և ուրիշներ հայերի և պարսիկների քաղաքական հարաբերությունների մեջ հակված են տեսնելու երկու կողմ միայն. Արշակունիներ և Սասանյաններ, որոնք կանգնած են իրար դեմ։ Կարծում ենք, որ այդ պատճառով իրադարձությունների պատկերը խաթարվում է։

⁶⁹ Ի վ ի ս Ր ի ո ս Կ ե ս ր ա ջ ի, Եկեղեցական պատմություն, Ը—ԺԸ։

⁷⁰ А н н и н с к и й, Древние... էջ 61. տե՛ս նաև 2. Մ ա ն ա ն դ յ ա ն, Քննական..., հատ. 2, էջ 120։ «Այսպիսով,— եզրակացնում է Աննինսկին.— հայերը պայքարել են հայկական թագավորության այն թեկնածուի դեմ, որը հետագայում դարձավ ամենանշանավոր հայ թագավորը և հայ ժողովրդի մեծագույն բարեգործը։ Այդ անհաջող օպերիցիան, ինչպես, չէր կարող հաճել լինել հայերին և բոլորովին վարմանալի չէ. որ նրանք ձգտել են մոռանալ այդ մասին» և այլն։

296 թ., արդեն արքայից արքա, Ներսեսը Գալերիոսից այնպիսի պարտության կրեց, որ պատրաստ էր ամեն պայմանների, և մտածել, թե այլևս հնարավոր էր հայերի կամ պարսիկների կողմից դիմադրություն, այն էլ վեց անգամ, անկարելի է: Խաղաղության դաշինքը տեղեց 40 տարի և ոչ թե խախտվեց անմիջապես: Հրովարտակում Գալերիոսը նկատի ուներ Ներսեսին (որ կոչվում էր Հայաստանի մեծ թագավոր), հնարավոր է՝ նաև, Հայաստանի արևելյան մասում ինչ-որ մի շրջան, որը դեռ գտնվում էր Ներսեսի իշխանության տակ: Գալերիոսի վեց հաղթանակները պետք է փնտրել 287—297 թթ. միջև: Հռոմեացիները Ներսեսի հետ ոչ մի պայմանավորվածություն չունեին և կարող էին ազատ լինել իրենց քայլերի մեջ: Դիոկղետիանոսի և Վահրամ II-ի համաձայնությունը չէր խախտվում:

Լուկոնիսը ճիշտ է նկատում, որ Ներսեսի համար «Հայաստանի մեծ թագավոր» տիտղոսը «ավելի շատ հավակնություն էր, քան ուներ իրական արժեք»: «Հայաստանը դեռ պետք էր նվաճել», — գրում է նա: Ներսեսին էր պատկանում Ասորեստանի մեծ մասը, նրա արքայանիստ քաղաքը Շիզն էր⁷¹ և ոչ Արտաշատը կամ Վաղարշապատը:

Երրորդ դարը, որ Արևելքում նշանավորվեց Սասանյան դինաստիայի հաստատմամբ, Արշակունիների Հայաստանի համար պայքարի մի շրջան էր, որով պայմանավորվեց նրա հետագա քաղաքական ուղին: Զորորդը սկսվում է խաղաղությամբ, որ տեղեց մինչև 338 թ.: Քրիստոնեության ընդունումը Հայաստանում և ձանաչումը իբրև պետական կրոն, որ կարևոր դեր խաղաց, կապվում է Տրդատ III-ի անվան հետ:

Եթե համառոտակի փորձենք տալ III դարի երկրորդ կեսի կարևոր դեպքերի ժամանակագրությունը, ապա այն կստանա այսպիսի տեսք.

252/3.— Տրդատ II-ը փախչում է հռոմեացիների մոտ, իսկ նրա ոչդիները մնում են Հայաստանում:

252/3-ից մինչև 257/8.—Հայաստանի զահի վրա է խոսրովր՝ Տրդատ II-ի որդին:

257/8.—Խոսրովր դավադրաբար սպանվում է իր եղբայրների կամ պարթև Անակի կողմից:

257/8—261.— Երկիրը կառավարում է Տրդատ III-ի խնամակալ Արտավաղը, հավանաբար՝ Արտավաղը Մանգակունին:

261—286/7.— «Ժամանակ անիշխանության», ըստ Խորենացու:

261—272 (273).— Որմիղդ-Արտաշիր Սասանյանը իբրև «Հայաստանի մեծ թագավոր»:

272(3)—274.— Իշխում է Շապուհը՝ Որմիղդ-Արտաշիրի որդին:

275—286/7.— Ներսես Սասանյանը իբրև «Հայաստանի մեծ թագավոր» (275/6-ին Տրդատ III-ը հռոմեական զորքերով զալիս է Հայաստան):

286/7.— Տրդատ III-ը հռոմեացիների և պարսիկների կողմից ձանաչվում է իբրև Հայաստանի թագավոր:

286/7—297.— Ներսեսը փորձում է վերահաստատել իր իշխանությունը Հայաստանում:

297.— Գալերիոսի հաղթանակը Ներսեսի դեմ և Հայաստանի սահմանների կարգավորումը: Սկսվում է քառասունամյա խաղաղության շրջանը:

⁷¹ Луконин, Культура..., էջ 111:

АРМЕНИЯ И ПЕРВЫЕ САСАНИДЫ

Доктор филол. наук А. А. МАРТИРОСЯН

(Резюме)

История армянского народа второй половины третьего века изучена недостаточно. Имеются разногласия и много нерешенных вопросов, в частности, в области хронологии. На основании греко-римских и армянских источников, а также данных персидских надписей в статье прослеживается политическая история армянского народа и предлагается нижеследующая новая хронологическая последовательность событий во второй половине III в.:

252/3.— Трдат II бежит к римлянам, а его сыновья остаются в Армении.

252/3—257/8.— На армянском престоле сын Трдата II—Хосров.

257/8.— Хосрова изменнически убивают его братья либо парфянин Анак.

257/8—261.— Страной правит опекун Трдата III Артавазд, возможно, Артавазд Мандакунн.

261—286/7.— По Хоренацн, «Период безначалия».

261—272 (273).— Хормизд-Арташир Сасанид—«Великий царь Армении».

272/3—274 — Царствует Шапур, сын Хормизда-Арташира.

275—286/7.— Нарсе Сасанид—«Великий царь Армении». (В 275/6 г. Трдат III с римским войском прибывает в Армению).

286/7.— Трдат III признан римлянами и персами армянским царем.

286/7—297.— Нарсе пытается восстановить свое владычество в Армении.

297.— Победа Галерия над Нарсе и установление границ Армении. Начало сорокалетнего мирного периода.